

SAN PABLO CARTA NYAFYTE FI'JNI CORINTO CHJAMBTEWE'SH JÏI

Corintotewe'sh Dyus yacj fi'nzesawe'shtyi Pablo fi'jni

1 ¹ Andya' Pablo yaasetj, Dyus peeygājrra pa'yate Jesucristo jycaajnis. Tyā'wē yūuwa'ja's Dyuscu tyjityjrra nvijt. ² Corinto chjambte yacjtjē'jwe'shtyi wechana fi'jatstju, tyā'wēy yacjtjē'j Sostenesva yuwe wechaacaja'c. I'cue'sha' Cristo Jesus yacj tyutemée fi'nzeyā' utyaapa'ga Dyus luuchi'cue. Majūwe'shva cue'shtyi jype'jsa Jesucristo yasena cysussa ūstyna tyāawe'sh yā'jrra ja'ndarraj tyajy tashte yuurráa fi'nzecajncu Dyusa' pa'ya. Tyāa Jesucristo' cue'sh jyucaysaty jype'jsa'. ³ I'cue'shtyi' Dyusa' pu'chjina vite' cue'shtyi jype'jsa Jesucristova. Tyāa pa'ga Dyus yacjrráa mfi'nzewe.

Jesucristo pu'chpa'ga Dyusa' quīj yujva peejymée jyucac pees

⁴ Dyusa's wechana nestju yu' i'cue'sh pa'gate, tyā'wē Dyusa' i'cue'shtyi peeygājrra quīj yujva peejymée jyucac pees Jesucristo pu'chpa'ga. ⁵ Tyā'wē Cristo yacj fi'nzeyā' utyaapa'ga, Dyusa' tyajy dyi'pte quījteva jyuca i'cue'sh shiingmée fi'nzewa'ja's jyucac ūs, Dyus yuwe's pta'shwa'j ma'c yuu, meerra' maa isa pta'shsateva jiyuwa'j ma'c yuu nava jyuca. ⁶ Tyāa pa'ga Cristo caapiya'jni's i'cue'sh ūuste caavya'ja'i'cue. ⁷ Tyā'wē Dyus pu'chte', i'cue'sha' quījte yujva shiingmée i'cue tyajy dyi'pte fi'nze' Jesucristo quīwa'j ena's ūytjasna. ⁸ Dyusa' tyā'wē ewrráa jype'jna nes yuuna nmej entepcach, cyaj Jesucristo quīi ente' i'cue'sha' quījte yujva yuuwemeesa yuune'cue. ⁹ Dyusa' na'wē ewrráa jype'jya' neeyūuc na' cytey yuuna. Tyā'wē ewrráa jype'jya' fírráac tyajy Nchi'c Jesucristo yacj fi'nzeyā' pa'ya i'cue'shtyi'.

Dyus yacj fi'nzesawe'sh puuty puuina tyuteni

¹⁰Cue'shtyi jype'jsa Jesucristo dyi'pte yacjtjē'jwe'shtyi yu'cypejetstju, puuty ewterraj puuty we'werra tyutemée cyanzí ja'ndarraj teehsa na'wērrarráa ew yajcyna fi'nzecajn. ¹¹Cloé yattewe'sha' andya's pta'shtyi tyā'wē i'cue'sha' puuina fi'nzena ūsta' jīna, tyāa pa'gatj andy yacjtjē'jwe'shtyi tyā'wē we'we'. ¹²I'cue'sha' teehsa na'wērraj fiyfiy we'wena ūsi'cue: Maaí yu', andya' Pablo yacj u'jsatj, naapcachja' vite' Apolos yacj u'jsatj. Vite' Pedro yacj u'jsatj, atsa' viteí yu' Cristo yacj u'jsatj jīna i'cue we'we'. ¹³Nava Cristo' ¿teech ajtewe'sh yacjrráa fi'nzewa'jsaga yuúá'? ¿I'cue'sh pa'gate Pabloja cluuste uuá'? Meerrava ¿i'cue'sha' Pablo yase's cysusrracue yu'te bautisāyni yuúá'? ¹⁴Ewrráa ne'tca i'cue'shtyi maa yujtyva yu'te bautisāymée, naasáa Crispo vite' Gayo tyāawe'shrráaty'tju bautisāy. ¹⁵Tyāa pa'ga quim yujva tyā'wē Pablo yase's cysusrra bautisāynitj jīya' ājameetya. ¹⁶Vite' Estefanaswe'shrráaty'tju bautisāy, meerra' vitety bautisāy vá'ntca nava tyāa yuutyi' yaaqui'tsmeetj. ¹⁷Cristo' andya's bautisāy'caajme', naasáa cue'sh ewte neeyūuwa'ja's pta'shya'rráac caaj. Nava naa quiwetewe'sha's jiyunisa yacjméc pta'shcaaj. Tyā'wēme', Cristo cluuste uuni's pta'shnisa' e'scjē neeyūuwe'shte.

Nwe'weya' ājawa'ja's Dyus pjeu'jrra nviitnisa

¹⁸Cristo' cue'sh pa'gate cluuste uuc jīna pta'shni' quījva seelpimeesa na'wē ne' ptjūuse' viturra ñus quiwete u'jwa'jsatyi'. Nava Dyus yacj ūsya' u'jwa'jsa cue'sh yuutyi' tyā'wē pta'shni' seena' wala seelpisa', cue'shtyi ewte nviitwa'jsa' naa pa'ga. ¹⁹Dyus librate we'werra:

Iviitu'nja naa quiwetewe'shrrá's jiyuni's,

Sa' naa quiwetewe'shrrá's jiyuni's quījte yujva selpiiwa'jmée nviitu'nja jī'c.

²⁰Tyā'wē' atsa' naa quiwetewe'shrrá's jiyuni' ¿quījte selpiicy? Quījteva jyuca jiisa caapiya'jsatja'w sūjsa' ¿mtee yuutyqui? Naa quiwete quīj ūsna tyā'sna jyuca jiisatjē'j ¿quīj yuucy? Áchja' tyā' ¿quījterrá' selpiima'c? Naa quiwetewe'shrrá's jiyunisa's quījteva seelpimeec vit Dyusa'.

²¹Dyusa' jiyuc naa quiwetewe'shrrá's jyuca jiyusa' Dyusa's jiyuya' ājawa'jmeesateva. Tyāasac quījteva jiimeerrava tyā'sna ūusuj jyuca yajcyrra tyajy pta'shni's wa'lmée jypa'gaterráa nwe'wewa'ja's vit, macue tyajy pta'shni' vite yacj yu' seelpimée na'wēteva.

²²Judiuwe'sha' cielujū seena'sa caavya'jal'jni'styi uy wēje', naapcachja' griegowe'sha' naa quiwete jiyunisa'styi pacué'. ²³Nava cue'sha' Cristo's cluuscjē qui'prra icjnirrá'stja'w pta'shi'. Judiuwe'sha' tyā'wē pta'shni'styi jypumba', naapcachja' griegowe'sh yuutyi'sa' quījteva seelpimée luucu we'weni na'wē ne' ptjūuse'. ²⁴Nava Dyus tyjityjnisa judiu vite' griego

tyāawe'sh yacj yu', Cristo yuurraa nwe'wewa'jsa', nwe'wewa'ja's Dyus pjeu'jrra nviitnisa. ²⁵Naa quiwete nasa jiisa ūstyna tyāawe'sh yacj yu', Dyus jiimeesa na'wēsarrava, tyāawe'shte jytjaacue jiisa' Dyusa'. Atsa' Dyus chjächjameerra ājasamée na'wēsarrava, nasa naa quiwetewe'shte jytjaacue chjächjasa'. ²⁶Yacjtjē'jwe'sh, i'cue'shtyi Dyus tyjityjni's mjiyuwe. I'cue'sha' naa quiwetewe'sha's yu' walamée jii i'cue sa' chjächjasava cujmée i'cue, sa' jytujtesava cujmée i'cue. ²⁷Tyā'wērrava i'cue'sha' Dyus tyjityjnisa i'cue, i'cue'shtyi jiimeesata' jīna naa quiwetewe'sh nasa we'we'ty tyāawe'shtyi caytjame'jwa'jsa. Sa' tyā'wēy naa quiwete nasa we'werra': Chjächjamée ājmeesata' jī'ty tyāawe'shtyiva caytjame'jwa'jsa. ²⁸Naa quiwete nasa we'werra': Quijteva seelpimeesata' jīnaty atsewe'we' tyāa atsewe'wesaty seelpimeecjē nviitwa'jsa i'cue. ²⁹Tyā'wē i'cue'sha' ājmeequesaty tyjityjnisa i'cue na' quim yujva Dyus dyi'pte iiwech yajcyna fi'nzeya' ājameene'cue. ³⁰Cristo Jesus yacj fi'nzewa'ja's Dyuscu vit. Atsa' Cristo's jiyuwa'ja'sva Dyus írráac vit. Sa' tyāa Cristopa'ga yuurraa cue'sha' Dyus dyi'pte ewtetja'w neeyūu, tyajy tashu tyutemée fi'nzeya'. ³¹Tyāa pa'ga Dyus yuurra's wechana tuutje'jwa'ja's Dyus librute na'wē fi'jni ūsa': Maava jīitj sūjna jytujtje yaacywēje'tsrra', Dyus yuurra's wechana tuutje'jwa'ja' jī'c.

Cristo cluuscjē uuc tyajy caapiya'jni's pta'shni

2 ¹Yacjtjē'jwe'sh, andya' Dyus yuwe's caajiyu'jya' cytee pa'jrra', jiisa we'weni seena' zhichcuesa yacj pta'shna pa'lmeettj. ²Cytee i'cue'sh yacj ūsrra', naa quiwetewe'sha's jiyunisa yacj pta'shna ūsu'tsmeettj, naasáa Jesucristo's cluuscjē qui'prra icjnirrá'stju pta'shna ūsu'. ³I'cue'sh tashte pa'jrra', wala jiisa na'wē pa'jmée, wejyva jiimeesa na'wē ūucjna pa'jrratj Dyus yuwe's i'cue'shtyi pta'sh. ⁴Nava naa quiwetewe'sha's jiyunisa yacj we'werra i'cue'shtyi' cnaymeettj. Tyā'wē yūmée, wejyva Dyus pu'chte tyajy Espiritu yacjrráatj caajiyu'jrra i'cue'shtyi' cnay. ⁵I'cue'sha' naa quiwetewe'sha'srráa piyarra Dyusa's jiyumée, wejyva Dyus írráa pu'chte Dyusa's jiyusa yuucajntju naa quiwete jiyunisa yu'sa' we'wemée.

Dyus pjeu'jnityi' tyajy Espiritu yacj írráac ya'jiyu'

⁶Tyā'wērrava, Dyusna ew yā'j jiisa yacj yu' tyā'wē we'weni' seena' yuj jiisa we'wenisata'. Nava tyā'wē we'weni' naa quiwetewe'shmeeta', sa' naa quiwete ne'jue'sh scjēwwa'jsa ūsta' wala jiisa tyāawe'sh we'weniva meeta', ⁷wejyva naa quiwe meetey bagachte yujva psumée cue'sh ewte neeyūuwa'ja's Dyusa' pjeu'jrra jī'pjyā'cj yu' quim yujva jiyunimeesa tyā'snatja'w pta'shí'. ⁸Tyā'sa' naa quiwete ne'jue'sh quim yujva jiyumeeta'. Jiyuvatsa', cluuscjē qui'prra icjwa'jmée ne'ta yu' cue'shtyi jype'jsa cielujūwe'sha's. ⁹Nava Dyus librute fi'jni ūsyā'cj yu' tyā'wē jiyuwa'ja'smée, tyāa pa'ga ne'ta jiyumée. Tyajíic na'jī':

Dyusna yaacysawe'sh jii Dyusa' pjeu'cj tyāa pjeu'jni's
 Quim yujva iuymeeta', sa' iiwēse'jva meeta',
 Sa' ūsterrāa yujva yaacyni ji'pju'tsmeeta' jīna fi'jni'.

¹⁰Dyusa' tyajy Espiritu yacjcu tyā'wēsaty cue'shtyi caajiyu'j, tyāa pa'gatey tyajy Espiritu' Dyus pjeu'jni quim yujva jiyuwa'jmeesa ūstyna tyāaty jyuca jiisa'. ¹¹Ayga nasaa pwe'shrrāa yujva ¿quim jiyuya' ājacy vitee ūs yaacyni's? Naasāa tyā'wē yaacysayrrāa ¿jiyumeema'c? Tyā'wēy Dyus Espiritu yuurraa jiia' Dyus yajcyrra pjeu'jnīsatyi'. ¹²Cue'sha' naa quiwetewe'sha's jiyunisa's jypa'garra ūsmeetja'w. Dyus Espiritu tyajy tashu yuusa'stja'w jypa'ga, Dyus peeygājrra cue'shtyi ew yūuc tyāaty jyuca jiyuya'. ¹³Tyāasatja'w cue'shtyi Dyus ew yūuni's tyajy Espiritu caajiyu'tje pta'shya' āja', sa' naa quiwetewe'sha's piyani's pta'shi'tsmeetja'w. Dyus jii'tyi' Dyus Espiritu yacjfirraatja'w pta'shi'.

¹⁴Nava Dyus Espiritu's ūuste ji'pjmeesa' Dyus Espiritu we'weni's jiyuya' ājameetyna. Tyā'wēsa yacja' jiimeecuesa we'weni na'wērrāa ptjūsena. Dyus we'wenityi' Dyus Espiritu yacjrrāa ya'jiyuna, tyāa pa'ga Dyus Espiritu yacjmée yu' jiyuya' ājameetyna. Dyus yaacynityi' Dyus Espiritu yacjrrāa jiyuya' ājatyna. ¹⁵Nava maava Dyus Espiritu's ūuste ji'pjsa' jypumbamée ew jiyuya' ājatyna, atsa' tyā'wē yūusa's jypumbana ūsa' jīya' ājameetyna maa yujva. ¹⁶Tyā'wē jiyuya' ājawa'jmeete firraac Dyus libru'te na'wē we'we': ¿Quim jiyuya' ājacy Dyus yaacyni's? Dyusa's ¿quim caapiya'jya' ājacy? jī'c. Tyā'wēteva, cue'sha' jii'tja'w Cristo yaacyni's, Dyus Espiritu caajiyu'pja'ga.

E'nzsa Dyus tashte mjiisarrāatja'w

3 ¹Yacjtjē'jwe'sh, macue wala jiisa ne'cue nava Dyusa's ew jiisa yacj na'wē yu' we'weya' ājameetj, Dyusa's quij yujva jiimeesa yacj na'wērrāatj we'weya' āja. Cristo caapiya'jni yu's quij yujva jii'mée luuch le'chcuc na'wērrāa i'cue. ²Luuch le'chcuesa's ma'wēta lechirraana puutsu' vite ū' yu's puutsmée tyā'wēy i'cue'shtyi' caapiya'jrrava tjēymeecuēsarrāanatj caapiya'jrra nvijt, tyā'wē tjēysa yu'sa' ājameei'cue naa pa'ga sa' āchpcach jiyuya' āja'tsmeei'cue. ³Tyāasa āchpcach i'cue'sh ūuste Dyusa's yu' quij yujva ji'pjmeei'cue, tyāasa i'cue puuty yajtsena puiina tyuteerra fi'nze'. Tyā'wē yūunisa', Dyusa's ūuste ji'pjmeesa fi'nzenisa'. ⁴Tyā'wē Andya' Pablo yacj u'lsatj jitspcachja' vite' Apolos yacj u'lsatj jīna tyā'wē yūurra', Dyusa's ¿ma'wērrāa yujva ūuste ji'pjmeesa na'wē yuj meecue vacy? ⁵Ūs miiyajcywe: Pablo' ¿quij yūusaana? Atsa' Apolosva ¿quij yūusaana? Cue'sha' naasāa Dyusna selpisarrāatja'w, Dyus ma'wē jycaatje' tyā'wēy mjiitja'w teehsa na'wērraj, tyāa pa'ga i'cue Cristo's jiyuwa'ja's ji'pju. ⁶Andya' nyafyte ujsarrāatj yu', naapcachja' Apolosa' yu'awsac yu'. Nava Dyuscu cbuucha'jrra nuywala. ⁷Tyā'wē uujsa vite' yu'awsa tyā'wē yūusa' quijva jytujtjesameeta', naasāa Dyus yuurraa

jytujtjesa', tyā'wē cbuucha'jrra nuywalapa'ga. ⁸Uujsa vite' yu'awsa tyāawe'sha' maa yujva jytjaacuesamée, tyāa na'wērrarráata'. Nava dewewa'j yu'sa' tyacuerrarráa yu'mée Dyusa' deweena, macue mjíite', tyā'srráan deweena. ⁹Dyus mjíinite cue'sha' cytee mjíisarráatja'w, atsa' i'cue'sha' Dyus mjíini quiwe na'wēsa i'cue.

Tyā'wēy i'cue'sha' yat na'wēsa i'cue, atsa' tyāa yata's tyajna pjeu'jsa' Dyusa'. ¹⁰Dyus jycaatje andya' yat tyajya' jiisa na'wē yat tyaajwa'ja's caachinda'jsarráatj. Atsa' andy tacjni cajcuete' vite mjíina ūsa' yata's. Nava ma'wē mjíiwa'ja'sva jypa'yacy mjíiwa'j ji'pja' teehsa na'wērraj. ¹¹Yat tyaajwa'ja's tacjna caachinda'jni ūsyā'ja' tyā' Jesucristo', atsa' quim yujva vite fiy caachinda'jwa'j ji'pjmeeta'. ¹²Na'wē caachinda'jni cajcuete quíj yacjva mjíityna: vyuu bej, vyuu chijme, cuet zhichcuesa yacj meerrava fytúu, tsjítj, cjíj tyā'wēsa yacj. ¹³Nava Dyus castigāywa'j ente ya'pdyi'purra ya'jiyuna ma'wē mjíini'sva. Tyāa ente' ipy yacj quíijana, atsa' tyāa ipya' caajiyu'juna mjíisa ma'wē mjíini'sva. ¹⁴Tyāa caachinda'jni cajcuete mjíisa' ew vāa mjíina ipyte chjavywa'jmeesa yacj atsa' tyā'wē ew mjíipa'ga dwení yuuna. ¹⁵Nava tyāa yatte mjíisa' ipyte chjavywa'jsa yacj vāa mjíina atsa' jyuca chjavyte', mjíipa'ga dwenimée yuuna. Naasāa cytee mjíisa yuurráa ewte neeyūuna, tyāa ipy walajú ūpjna casejsa na'wē.

¹⁶I'cue'shíi Dyus ūswa'j yati'cue, naa pa'ga Dyus Espiritu i'cue'sh ūste u'pwa'jsate jiimeevá'cue. ¹⁷Dyus ūswa'j yata' quíj pcal yujva ji'pjmeesa na's maava Dyus ūswa'j yata's iviitute', Dyusa' iviituna tyā'wē yūusa's. Tyāa Dyus ūswa'j yata' i'cue'shi'cue.

¹⁸I'cue'sha' maa yujva jypumbanuwe, wala jiisatja'w sūjna. Maava naa quiwetewe'sha's wala jiisa ūsrra', jiimeecuesa na'wērráa miijajcywe. Tyā'wē yuurráa, wala jiisa yuuna pa'jane'cue. ¹⁹Naa quiwetewe'shrráana wala jiyuni', Dyus dyi'pte' quíj yujva seelpimeesa'. Tyajíc Dyus librute na'wē we'we': Wala yā'j jítja'w sūjna fi'nzesatyi' ewmeete cjēewa'ja'scu vitu' Dyusa', tyā'wē yaacypa'ga. ²⁰Tyā'wēy vite ajcjēva na'wē fi'jni ūsa': Wala jítja'w sūjna fi'nzeni', quíjte yujva seelpimeeteva jiaa' Dyusa' jí'c. ²¹Tyāa pa'ga nasarráaty jytjaacue iijewch iijewch yajcyna fi'nzewa'jme'. Tyā'wē yaacyajmení quíjva jyuca i'cue'sh jíirráata'. ²²Pablo ma'c yuu, Apolos ma'c yuu, Pedro ma'c yuu, naa quiwe ma'c yuu, ityi fi'nzenisa ma'c yuu, uuwa'j ma'c yuu, naa ensu fi'nzeni ma'c yuu, vite ensu fi'nzewa'j ma'c yuu, nava tyā' jyuca i'cue'sh jíirráata'. ²³Naapcachja' i'cue'sh yu' Cristo jíi i'cue, atsa' Cristo yu' Dyus jí'.

Jesucristo jycaajnisawe'sh mjíini

4 ¹Tyā'wēyā'tje', cue'shtyi' naa sūjnarráa mfi'nzewe: Cue'sh ewte neeyūuwa'ja's Dyusa' tyāniitey pjeu'jrra ji'pju'c quim yujva jiyunimeesa tyā'sna pta'shcajn neewe'werra nvijtje Cristo tashte selpisaatyna sūjnarráa mfi'nzewe. ²Tyā'wē mjíiwa'ja's jypa'gasa' ma'wē

mjiiwa'ja'sva jyuca cytey yuuwa'lj ji'pja'. ³Andy mjiiini's i'cue'sha' ma'wēva nuywe'wene'cue. Nava i'cue'sh we'wenityi' andya' le'chcuerráa yujva yaacywa'lj ji'pjmeetj. Andyírráa yujva andy mjiiini' ewa' sūju'tsmeetj. ⁴Nava andy ūuste yu' ewme' sūjna yu'tsme!. Atsa' andya' ew mjiiisatj jírra tyā'wē we'wetsmeetj. Jesucristo yuurráa andy ma'wē mjiiisateva we'wewa'lj ji'pja'. ⁵Tyāa pa'ga mjiiini's we'wewa'lj en ājmeyna yu', i'cue'sha' nuywe'wenuwe. Mūytjaswe Jesucristo quijpcach. Tyāa yuurráa ew ma'c yuu ewmēe ma'c yuu nava caajiyu'juna macue jiyunimeesa ūusterráa yaacynisa sūtjni yuu ma'c nava jyuca. Tyā'wē yūunijū ya'jiyuna nasaa iisa ma'wē yūusaarrava.

⁶Yacjtjē'jwe'sh, tyā'wē nuywe'wena fi'nzeni'stju yu'cypeje!, Apolos fi'nzeni vite! andy fi'nzeni tyāaty tjengrra tyā'wēy fi'nzeczajn. Tyā'wē yuurráa, i'cue'sha' jypumbamēe fi'nzene'cue Dyus yuwe ma'wē jycaatje' tyā'srráa cytey yuuna. Sa' quim yujva tyā'wē teechsarrá's weech yajcyna wendyrra!, vite yu's ajtsena fi'nzemeene'cue. ⁷Indya's ¿quimga jytjaacue walasa vit? Tyā'wē Dyus peesnimeesa ¿quijrrá' ji'pjnga'? Tyā'wē quijva jyuca Dyus peesnirrá's ji'pjrra!, ¿ma'wērranga iijewech yaaqui!, indyrráa pacuerra uysáa na'wē?

⁸I'cue'sha' quijva peejymēe ji'pjsa na'wē yā'ji'cue yaaqui!. Cue'sh yuutyi' e'scjē nvijtrra, jycaajsa na'wē i'cue yaaqui!. Wejyva jycaajsafi yuuvatsa' ewna, cyaj i'cue'sh jycaajnite cue'shva ij ūsya' āja'nja'w sūju'tj. ⁹Cue'sha' Jesus jycaajnisatja'w nava Dyusa' nmejcjē ne' nvijt sūju'tj, naasáa icjwa'lj nviitnisa na'wērráatja'w. Cue'sh pytjaa yuurra uutste!, angeleswe'sh vite! nasava tjengcajn nasa walaa cshavyte nviitni na'wē ūstja'w. ¹⁰Cristo caapiya'jni's pta'shpa'garráa cue'shtyi' quijteva jiimeesa luucu we'wesata' jī'ty, naapcachja' i'cue'sh yu' Cristo caapiya'jni's shiingmēe jyuca jiisa na'wē i'cue yaaqui!. Cue'sha' ājmeecuesatja'w, naapcachja' i'cue'sh yu' jytujtjesa i'cue. Cue'shtyi' atse'ty nasa!, nava i'cue'sh yuutyi' peeygāja'ty. ¹¹Āchpcach pytjaa yuunatja'w fi'nze!, nasa ewmēe nuywe'weni, wēena, yū'wēena, atjwa'lj ropa ji'pjmeēe, yatva ji'pjmeetja'w, ¹²sa' cuseju mjiiina wajtynatja'w fi'nze!. Nasa! cue'shtyi wēeshuteva, ewrráatja'w pasu!. Cue'shtyi pcyuuna pāpatsteva, wantāyrra iindeewe'tsmeetja'w. ¹³Cue'shtyi atsewe'wetsteva, ca'tu' peeygājnatja'w yu'cypeje!. Naa quiwete cytā' seelpimeesa na'wētja'w fi'nze!, canzhsa's wāataani na'wētja'w yajtsena fi'nze' āchpcach.

¹⁴I'cue'sh tjaamecajn tyā'wē fi'jatsmeetj, wejyva andy luuch wendynisa na'wē yu'cypejnarráatj fi'ja!. ¹⁵Cristo jycaajni's caapiya'jsa diez mil ma'cue ji'pj yuu, nava ney na'wēsa yu' cujmēe ji'pji'cue. Tyā'wē Cristo Jesus yacj fi'nzewa'ja's caapiya'pja'ga i'cue'sh ney na'wēsa' andytju. ¹⁶Tyā'wētj i'cue'shtyi neewe'we!, andy na'wēy fi'nzeczajn.

¹⁷Tyāasa cajatstju Timoteo andy nchi'c wendyni na'wēsa Cristo yacj tyutemēe fi'nzesa's. Tyā' i'cue'shtyi caayaqui'jina andy ma'wē

ne'tca Cristo yacj fi'nze tyã'sna. Sa' tyã'wëy mteerraj Dyusa's jiisa pcjaacjena ùstyna cysũ pecũjrra', ma'wë ne'tca caapiya'ja' tyã'snaírráa caayaqui'jina. ¹⁸I'cue'sh maafi yu' wala chjãchja iiwejech yajcyna ùsi'cue, Pablo' bagach yujva pa'jmeena jãna. ¹⁹Nava Dyus ma'wë jytjãaste!, dund yuwe'nja puuty uyya', tyã'wë iiwejech we'wena ùssa quíj ma'ty yuu aan chjãchja we'wena ùsrra', tyã'wëy Dyus yacjva chjãchja fi'nzena ùstyna. ²⁰Dyus yacj fi'nzenisa' yuwejurráa iiwejech we'wena fi'nzenimeesa', wejyva Dyus ma'wë jycaatje!, cytey yuuna fi'nzewa'ja'. ²¹I'cue'shtyi andy tjengya' pa'jrra' ¿ma'wëcue yuu jytjãasu'? ¿Pechuucue jytjãasucue!, meerra' peeygãjnacue pa'j jytjãasu'á'?

Peecy nji'j npaasa yacj íírráa nyu na'wë fi'nzesa

5 ¹Teech i'cue'sh yacj pcjaacjesa' peecy nji'j npaasa yacj íírráa nyu na'wë fi'nzena ùsa' jinic ya'jiyu!. Tyã'wë fi'nzeni' pcal iiméj wala canzhsa'. Dyusa's jiimeesa yujva tyã'wë yu' fi'nze'tsmeeta'. ²Tyã'wë canzh pcal yuusa's i'cue'sh cshavyu cutyi'jipcachte, ewsatja'w sújna iiweechwa'jrrá's i'cue yaaqui!. ³Andya' i'cue'sh yacj ij yu' ùsmeetj, nava andy ùs yaacyni yacj yu' i'cue'sh yacj ij ùstju. Tyãasatj tyãa pitstjé'j ma'wësatava jiyurra', castigãywa'tjeyã'j nvijt, andy ùs yaacyni yacjrráava. ⁴I'cue'sha' Jesucristo's neewe'werra tyajy dyi'pte mpuutywe'wewe pcjaacjerra. Atsa' andyva i'cue'sh yacj ij ùs na'wëyrráa pu'chji'nja, atsa' Jesucristova i'cue'sh yacj ij ùsuna. ⁵Tyã'wë yúurra tyãa pitstjé'ja's echtjé'j cusete manvijtwe, tyajy cacue' vitucajn. Nava tyajy ùs yu' vitumeena Jesucristo quíi ente!

⁶I'cue'sha' tyã'wë canzh pcal yuusa's cutyi'jmée ùsrra', iiwejech yajcyna ùswal' jipjmeel'cue. Jiimeevá'cue na'wë we'weni's: Levadura' le'chcuèerrava scuutyj ù'wete jyuca pëetjeje'c jini's. ⁷Levadura ewmeesa's mcutyil'jwe pëetjecajmen, cyaj i'cue'sha' Pascua fiestate ù'nisa pan levadura jipjmée na'wë yuune'cue. Tyã'wë pcal jipjmée fi'nzeczajncu Cristo' cue'sh pa'gate uu, tyã' cue'sh Pascuatewe'sh piishacuèc yu!

⁸Tyã'wëyã'tje!, cue'sh ùuste quíj yujva ewmeesa jipjmée Dyusa'srráa ùusuj jyuca yajcyna cue'sh Pascua fiesta's vitwal' jiptja'w. Tyã'wë ew yajcyna vitni!, pan levadura jipjmeesa yacj fiesta's vitni na'wësa!. Nava ewmée yajcyna Pascua fiesta's vitwal' jipjmeetja'w. Tyã'wë ewmée yajcyna vitni!, levadura ewmeesa yacj fiesta's vitni na'wë!

⁹Nyafii vite carta fi'tj tyãate! na'wëtj yúucaaj: Canzh pcal yúuna fi'nzesa yacj pcjaacjenuwe jinatj fil'j. ¹⁰Tyã'wë canzh pcal yúuna fi'nzesa yacj, vitee jiiity cusal'j wëesa, pesweesa, dyus ityimeesaty neewe'wesa tyãawe'sh yacja' jyucate mtyuteewe peena yu' puuty uymée fi'nzeya' jirra tyã'wë we'wemeetj. Tyãawe'sh yacj puuty uyya'mée tyutee wëerra!, naa quiwejũ casejrra yuurráa tyã'wë peena yu' puuty uymeene'cue. ¹¹Na'wëtj yúucaaj tyã'sna ne'cue jiyumée: Maava yacjtjé'tja'w jitsrrava, canzh pcal yúuna, vitee jiiity cusal'j wëesa ma'c yuu, dyus ityimeesaty neewe'wesa

ma'c yuu, atsewe'wena wēeshuusáa ma'c yuu, tūsáa ma'c yuu, meerra' pesweesa ma'c yuu, tyā'wē yūuna fi'nzesa's i'cue'sh cshavyte jype'ljuwe jīnarráatj we'wena fi'j. Nasa tyā'wēsa's i'cue'sh yat-su pi'cywa'jme', atsa' ca'tuva pi'cymeena. ¹²⁻¹³Dyusna jiimeesatyí' tyāawe'sh ma'wē yūusaateva andya' tyāatyí' paapējyna castigāywa'lj jí'pjmeetj. Dyusráa castigāywa'jsa' tyāawe'sh ājmée yūusaatyí'. Nava i'cue'sh cshavyte ūssa yacjtjē'jwe'sh ājmée yūuni yu's i'cue'sh paapēywa'jsai'cue. Tyāasa tyāa canzh pcal yūusa's i'cue'sh cshavyu mcutuyí'jwe.

I'cue'sh yuuwe yuuni's Dyusa's jiimeesa cjuēs tashsu paatyjī'cjni

6 ¹I'cue'sh pwe'sh yuwe susni's ¿quij yūurracue Dyusna jiimeesa cjuēs tashsu paatyjī'cjya' u'jue', wejyva yuwe susni's Dyusa's jiisa pwe'sh i'cue'shrráa pjeu'jupcachte. ²I'cue'sha' jiimeevá'cue Dyus luuchyá'ja' naa quiwe yujnava cue'sh jycaajwa'jsameevá'ntca'w. Tyā'wē naa quiwe yujnava i'cue'sh jycaajwa'jsarra' ¿quij yūurracue yuwe tjēymeesa yu's pjeu'jya' āja'tsmée? ³I'cue'sha' jiimeevá'cue cue'sha' angeleswe'sh yujtyva yu'cypejwa'jsameevá'ntca'w. Tyā'wērra', cue'sh pwe'sh yuwe susni's wejy ūucjmée pjeu'jwa'lj jí'ptja'w. ⁴I'cue'sh pwe'sh canzhtjē'j susna puini's ¿quijya'cue paatyjī'cjya' u'jue' Dyusa's jiimeesa tashsu? ⁵Na'wētj we'we' i'cue'sh tjaamecajn: ¿Yacjtjē'jwe'sh pwe'sh yuwe susni's pjeu'jwa'jsa teechráava jiisameeváana atsne'cue tyā'wē vitety pi'cyya' u'jue'? ⁶Yacjtjē'j pwe'sh yuwe susni's Dyusna jiimeesa cjuēs tashsu paatyjī'cjte' ¿ewmañ?

⁷Tyā'wē i'cue'sh pwe'shírráa puuty puina fi'nzeni' canzh tjaampa'sa', atsa' ¿mjíitecue i'cue'shtyi pesweena ma'wēva ptjāawetsteva Dyusa's jiimeesa tashsu yu' paatyjī'cjya' u'jmée shuuna' neeyū'tsmée? ⁸Tyā'wē yūumée i'cue'shtyi pesweete', i'cue'shva yacjtjē'j jīityírráa pesweena quijva ewmée i'cue yū'.

⁹⁻¹⁰Jiimeevá'cue Dyus jycaajna ūsnite u'caya' ājawa'jsameeta' tyā'wē ewmée yūusa' jīni's. Jypumbanuwe, tyā'wē yūusa' Dyus jycaajna ūsnite u'caya' ājawa'jsameeta': Pcal canzhgate fi'nzesa, dyus ityimeesa's neewe'wesa, ptamrrava vite yacj fi'nzesa, pitstjē'j pwe'shírráa pcal yuuna fi'nzesa, pesweesa, vitee jīity cusalj wēesa, tūsáa, wēeshuusáa, īshiirra vitee jī's iiyamusa tyāawe'sha' Dyus jycaajnite u'caya' ājameetya. ¹¹I'cue'sha' nyafíi yu' tyā'wēsa i'cue yu'. Nava áchja' Dyus peltunāyte', jyuca yaateni i'cue, sa' Jesucristo vite' cue'sh Dyus Espiritu pu'chte', Dyus yacj yuurráa fi'nzesai'cue.

Peecy cacue's pcalte caafi'nze'ljwa'jme'

¹²Cue'shtyi ma'wē yūuwechteva ma'wēva fi'nze'nja'w nava cue'sh fi'nzeni's quim yujva yupmeena jī'ty tyā' isa yuja'. Nava jyuca yuutyi's nwēese'ljwa'lj jí'pjmeetja'w, maafí yu' seelpimeesata' tyāa pa'ga. ¹³Isaty

we'we!: Ũ'a' tutyjtewe'sha!, naapcachja' tutyja' ũ' jypa'gawa'jsa!, atsa' tyāatyi' ¿quim yupuucy? jī'ty. Isa tyāa e'nzsa' tyā'wētewe'sh uujta!, atsa' tyāatyi' we'wewa'j jī'pjmeetja'w, ptsuwa'jsarráata! naa pa'ga. Nava cacue's ptammeesa yacj pcalte caafi'nze'jwa'jme!, tyāa pa'gatey cue'sh cacue' Cristo jī', naapcachja' Cristo' cue'sh cacue's jype'jsa! naa pa'ga. ¹⁴Dyusa' ma'wēga Cristo's ityi vit, tyā'wēy cue'sh cacue'sva tjēymée ityi vit ya'va!, naa pa'ga pcalte fi'nzewa'jsame!.

¹⁵I'cue'sh cacue' teehsa na'wērraj Cristo cacue'írrá!, atsa' tyā'sa' jiimeevá'cue. Tyā'wēte!, Cristo cacue's uwerra u'y ewmeesa yacj utyaate ¿ewmañ? Wej yujva tyā'wē yūuwa'jme!. ¹⁶Meerra' i'cue'sha' jiimeevá'cue, u'y ewmeesa yacj pcal yūunijū' teech cacuerráac yuuna pa'ja' jīni's. Tyā'sna we'werrac Dyus librute na'jī': E'nzsa teech cacuerráa yuuna pa'jana jī'c. ¹⁷Tyāa pa'gac maava Cristo yacj utyaate!, Cristo yacj teech cacuerráa yuuna pa'ja' Dyus dyi'pte.

¹⁸Ma'wē yujva nyumeesa yacj canzh pcal yuuwa'jme!. Pcal ma'wēsava ũsta!, nava peecy cacue yacj yu' meec pcal yu!. Nava ptammeerra canzh pcal yuuna fi'nzesa' tyajy cacue's írráac suwu!, pcalte jyūna u'jrra. ¹⁹Jiimeevá'cue i'cue'sh cacue' Dyus Espiritu u'pwa'ja!, tyāa pa'ga i'cue'sh ũuste' Dyus Espiritu u'pa!, atsa' cacue' i'cue'sh jīi me!. ²⁰I'cue'sha' Dyus weynisai'cue wala pa'gate. Tyā'wēyā'tje!, canzh yūumée Dyus dyi'pte ewrráa yūuna mfi'nzewe i'cue'sh cacue yacj vite! i'cue'sh ũus yaacyni yacjva tyā'wēy. Tyā'wēme!, e'nzfi Dyus jīirráata!.

Ptamunisu yu'cypejni

7 ¹I'cue'sh pējyna fi'jni's āchj pasya'vatj. Pitstjē'ja' nyu jī'pjmeé fi'nzeteva ew yujna. ²Nava tyā'wē pcal canzh yuuwa'jrráac wala caseje! naa pa'ga pitstjē'ja' nyu jī'pjuwa'ja!, atsa' tyā'wēy u'yva peecy nmi' jī'pjuwa'ja!. ³Nmi'a' zhichcue fi'nzewa'ja' tyāawe'sh nyu yacj, atsa' nyua' tyā'wēy ew zhichcue fi'nzewa'ja' tyāawe'sh nmi' yacj. ⁴Nyua' peecy cacue' sūjna yaacywa'j jī'pjme!, tyajy cacue' nmi' jī' naa pa'ga, naapcachja' nmi'va peecy cacue' sūjna yaacywa'j jī'pjme!, tyajy cacue' nyu jī' naa pa'ga. ⁵Ptamsa yā'ja!, ij fi'nzeni's puuty wa'lwajme!, naasáa Dyusna orāyya'varra yuurráa, manz enrráava tyutewa'ja!. Nava e'su yā'ja' qui' ij fi'nzewa'ja!, tyā'wēme! echtjē'j caypumba'jwe'shte.

⁶Maava jyucaysa ptamuwa'ja's jycaja'tsmeetj, nava ptamura fi'nzenic andy yacja' ew tjengu' naa pa'garráatj tyā'jī!. ⁷Jyucay andy na'wērráa fi'nzevats, wejy ewna sūju'tj. Nava Dyusa' nasaa iisa fiyfiy fi'nzewa'ja's ne' pees, vitetyi' ptamura fi'nzewa'j, vitetyi' ptamumée fi'nzewa'j.

⁸Viudawe'sh vite' ptammeesaty'tju yu'cypeje! tyāawe'sha' ptamumée andy na'wērráa fi'nzevats wejy ewna. ⁹Nava peecy cacue jytjāasni's neeweya' ājasame' ptamura fi'nzeni wejy ewna, tyāasurráa yajcyna fi'nzeya'mée.

¹⁰Nava ächja' ptamsatyjtju jycaaja': nyua' nmi' yacj tyutewa'j ji'pjme'. Na'wë jycaajni' andy yajcyrra we'wenime!, Dyuscu tyä'wë jycaaja'. ¹¹Nava maa enteya' maafi' yu' tyä'wë nmi' yacj tyuteváana nava tyäa' u'ya' peena yu' vite yacj iimi'ya' äjameena. Meerra' nmi' yacj qui' yuwee ewuurra yu' nmi' tashtey qui' shawendya' äjana. Tyä'wëy nmi'va tyajy nyu yacj tyuteeya' äjameena.

¹²Ächja' vitetyi' andy üs yaacyni yacjtju yu'cypeje': Maa yacjtjê'j nyuuva Cristo's üste jypa'gasameerrava, nmi' yacj wa'lmée fi'nze wëyã'tje', nmi'a' tyutemeete ewna. ¹³Tyä'wëy nyua' Cristo's jypa'gasateva nmi'a' Cristo's jypa'gasameerrava, nyu yacj wa'lmée fi'nze wëyã'tje', tyäa nyua' tyutemeete ewna. ¹⁴Nmi' Cristo's jypa'gasameerrava, tyajy nyua' Cristo's jypa'gasa yacj wa'lmée fi'nzepa'ga, tyäawe'sh ptam fi'nzeni' Dyus dyi'pte ewsa'. Atsa' tyä'wëy nyu ma'c Cristo's jypa'gasamée yuu nava tyajy nmi' Cristo's jypa'gasa yacj wa'lmée fi'nzepa'ga tyäawe'sh ptam fi'nzeni' Dyus dyi'pte ewsa'. Tyä'wëmeevatsa', i'cue'sh luucha' Dyus peeygäänisamée yuutyna. Nava ewstate írráa i'cue'sh luucha' Dyus peeygäänisata'. ¹⁵Nava Cristo's jypa'gasamée nmi' ma'c yuu meerra' nyu ma'c yuu nava tyutee wëete', wa'lmeete ewna. Tyä'wë yu' tyuteeya' äjane'cue, tyäa pa'gatey Dyusa' puuty puimée fi'nzewa'ja'scu jycaaja'. ¹⁶Tyä'wë nmi' ma'c yuu meerra' nyu ma'c yuu nava tyä'wë peecy nmi'a's Dyus jii cnayu'nja süjna tyutemée fi'nzerrava, jii yu' meec ya'fi'nze' Dyusa's jiyuwa'jsamañ jiyuwa'jsameemañ nava.

¹⁷I'cue'sh fi'nzewa'ja's ma'wëne' Dyus nvijt atsa' tyä'srráa cytey nwëese'jna fi'nzewa'ja' nasa iisa teeche na'wërraj. Nyaffi i'cue'shtyi Dyus pa'yatste ma'wësane'cue yu' na' tyä'wëesa mfi'nzewe. Dyusna yaacysa mteeva pcjaacjesa üstyna tyäawe'shtyi' tyä'wëtj jycaaja'. ¹⁸Maaí yu'sa' circuncidäynisa's váa Dyus pa'yana atsa' tyä'wë circuncidäyni mneeyüu. Vite' circuncidäynimeesana váa Dyus pa'yana atsa' tyä'wëesa mneeyüu ya'circuncidäymée. ¹⁹Ya'circuncidäy ma'c meerra' ya'circuncidäymée ma'c nava tyä' qui'jva meesa'. Dyus jytjääsni's cytey yuuna fi'nzeterráa qui'jva yuumeena. ²⁰Nasa iisa ma'wësarraj ne'cue yu' Dyus pa'yatste', tyä'wëesa mfi'nzewe. ²¹Meerra' indya' vitee cusete jycaajni fi'nzena üste vá' Dyusa' pa'ya atsa' tyajü casejmée fi'nzewa'ja' cuj yajcymée. Nava tyäa selpini'jü casejya' ewuwechte', mcaasej tyäajü. ²²Tyä'wë Dyusa' Cristo's üste jypa'gaya' pa'yatste', vitee cusete jycaajni fi'nzena üssarrava, ächja' vitee jycaajni'jü casejrra Cristo's selpisáa i'cue yuu Dyus dyi'pte. Tyä'wëy vitee cusete selpisamée ma'c yuu nava ächja' vitee cusete selpiiya' u'casa yuuna Cristo tashte. ²³I'cue'sha' Dyus weynisa i'cue pa'gate. Tyäa pa'ga naa quiwete nasaa nwe'shtyi selpisáa äjmeeccusatja'w süjmée mfi'nzewe. ²⁴Tyä'wë' naa pa'ga yacjtjê'jwe'sh, ma'wësarraj ne'cue yu' Dyus pa'yatste', nava tyä'wëesa mfi'nzewe nasa iisa teeche na'wërraj Dyus yacj tyutemée.

25 Cna'sawe'shtyi' Dyusa' tyā'wēc jycaaja' jīwa'j yu' quīj yujva ji'pjmeetj. Nava Dyus yacj ew fi'nzesa yu'cypejni ewna sūjrratj andy ūs yaacyniju na'wē pta'shi': 26 Pitstacya' teechrráa yā'j fi'nzetsrra', tyā'wēesa fi'nzete ewna sūju'tj andya', naa ensu' fi'nzewa'j wala tjēya' tyāa pa'ga. 27 Nyu ji'pjyā'jrra', tyutewa'ja's yaacynu. Nyu ji'pjmeesa', nyu yuuwa'jsa pacueya' yaacynu. 28 Nava ptamunisa' pcalme', atsa' cna'sa ma'c ptamuuya' yajcy nava tyāava pcalme'. Nava ptamusa' naa quiwete űuswa'j tjēysa's pejca ji'pjutyna, atsa' tyāatytju ji'pjmeevatsa' sūju' andya'.

29 Yacjtjē'jwe'sh, na'wē fi'nzewa'ja'stju pta'shi': Cuj enmeerráa yā'j ūsa'. Naajūyā'ja' ptamrrava nyu ji'pjmeé na'wērráa mfi'nzewe. 30 űuswa'j en pa'tjeva, űusmée ūssa na'wērráa mfi'nzewe. Naapcachja' fiestate ūssa' wechana ūssa na'wēmée mfi'nzewe. Quīj weyni ji'pjrrava tyāa weyni' cue'sh ji' sūjmée mfi'nzewe. 31 Naa quiwete quījva wala ji'pjsa' ji'pjmeesa na'wērráa meswe. Tyā'wēme', naa quiwe' ptsuuya'va.

32 I'cue'sha' peecy yatte tjengna fi'nzewa'ja's ji'pjmeé fi'nzевats wejy ewna sūju'tj. Tyā'wē maava nyu ji'pjmeesa' yatte tjengwa'ja's yajcymée Dyus yacj ew fi'nzewa'jrráanac pa'pchuna fi'nze'. 33 Nava nyu ji'pjsa' peecy yatte tjengwa'ja'srráac jytjaacue pa'pchuna fi'nze', tyajy nyu peejymée fi'nzecaajn. 34 Tyā'wēy u'yva nmi' ji'pjsa vite' nmi' ji'pjmeesa' tyā'wērrarráa yajcy na fi'nze'tsmeeta'. Nmi' ji'pjmeesa' Dyus jīrrá'scu jytjaacue pa'pchuna fi'nze', tyajy cacue tyajy ūs yaacyni yā'jrra Dyus dyi'pte ew fi'nzeya'. Naapcachja' nmi' ji'pjsa' naa quiwetewe'sha'srráac wejy jytjaacue pa'pchuna fi'nze', nmi' wechacajn.

35 Na'wētj pta'sh nava i'cue'shtyi yupna tyā'jītsmeetj, wejyva i'cue'shtyi selpiwa'ja's pu'chnarráatj tyā'jī', cyaj Dyusa's yuurráa wejy tjaacue selpiina fi'nzene'cue sūjrratj tyā'jī'.

36 Tyā'wēteva maafí yu' andy niisa's cmi'a'tje wejy ewna. Tyā'wēme' e'suyā'ja' iimi'ya' ewumeena sūjna yaacysa', cmi'a'jane'cue, i'cue'sh ūuste ma'wē Dyus caaūsutje'jena tyā'snarráa cytey yuuna. Mi'rra fi'nzeni' pcalsame!. 37 Nava vite' tyā'wē niisa's cmi'a'j wēmeesa', cmi'a'jmeene'cue tyā'sa' quimva jycaajmeena atsa' cmi'a'jmeerra', wejyva ew yūuna. 38 Maava tyā'wē cmi'a'jsa' ew írráa yūuna. Nava cmi'a'jsame' jytjaacue ew yūuna.

39 U'y iimi'sa' nmi' yacj tyuteeya' ājameena nmi' nee ityiye yu'. Tyā'sa' leycu tyā'wē juuna' jycaaja'. Nava nmi' uute yuurráa qui' iimi'ya' ājana maa yacjva, nmi' yuuwa'jsa Dyusa's jiisa yacj. 40 Nava nmi' uuyā'tje' peena yu' iimi'meerra', wejy wēt fi'nzena. Andya' tyā'wētj yaaqui', atsa' andya's Dyus Espiritu ne' caaūsutje'je' sūju'tj.

Dyus ityimeesaty wechaya' tajcy icjni's pta'shni

8 1 Āchja' Dyus ityimeesa ūsta' tyāaty wechaawa'j tajcy icjnisa's pta'shya'vatj. Tyāa chicha' quījva suwwa'jsameeteva tyā'sa' ew

jiitja'w cue'sha'. Nava tyã'wë jiitj sūjnisa' weech we'wewa'jrráac caseje', atsa' puuty ya'peeygājna Dyus yacj chjāchja fi'nzewa'j yu' ya'ji'pju'tsme'.
 2Maava tyã'srráana jiirra jiitj sūjna fi'nzesa', quijva jiimeeta' ew jiisa na'wë yu'.
 3Nava tyã'wë yūumée, Dyusa'srráa ūusuj jyuca yaacysa's Dyusa' jiia' tyã'wë yūusa's.

4Tyã'wë dyus ityimeesaty wechaya' tajcy icjnisa chicha's ū'te ¿ewmée dyijmañ? Ew ūus miiyajcywe. Tyāa dyus ityimeesa' naa quiwete quij yujva meesata', naasāa teech Dyus yuurráa ityisa ūsa', peena vite yu' meeta'.
 5Dyus yaasesa naa quiwete vite' cielute ūsváatyna tyã'wë yaacysa yacj yu'.
 6Nava cue'sh yacj yu', teech Dyus yuurráa ūsa' cue'sh Tata cielute ūssa. Tyāac quij yujva peejymée jyuca taqui'jrra nvijt, atsa' cue'sha' tyāa pa'garráatja'w ityi fi'nzeya' āja'. Tyã'wëy cue'shtyi jype'jsava teechrráa ūsa', tyã' Jesucristo'. Quijva jyuca tyajy tjengna jype'pja'garráa ūsta', tyāa pa'ga cue'shva tyajy jype'jnisa írráatja'w.

7Atsa' tyāa yacj ūssa yacja' chich tyã'wësa's ū'teva, quij yujva suwwa'jsameeteva tyã'sa' jiimeeta' jyuca yu'. Tyāasaty naa quiwete dyus ityimeesaty nyafii neewe'wesawe'sh Dyusa's achamée ew jiisa' chich tyã'wësa's ū'te', ewmeena sūju'.
 8Nava cue'sh ū'ni' Dyus dyi'pte ewsa vitwa'jsame'. Atsa' tyã'wë ū'rra' ewsa yuume'nja'w, sa' ewmeesava yuume'nja'w.
 9Tyã'wëteva, mpa'yajcywe, i'cue'sh tyã'wë quijnava ū'ya' āja'nja'w sūjrra tyāa chicha's ū'pa'garráa Dyusa's achamée ew jiisaty pcalte cweete'jwe'shte.
 10Meerrava na'wë vaa yuune'nga: dyus ityimeesaty wechanisa chich tyweyni's vaa ū'ya' cachjiine'nga, atsa' Dyusa's achamée ew jiisa uyrra', tyāava tyã'wëy ū'wena.
 11Atsa' iindypa'garráa Dyusa's achamée ew jiisa iindy yacjtjē'j ūusa' vituna, tyajy pa'gate macue Cristo uuteva.
 12Atsa' Dyusa's achamée ew jiisa yacjtjē'jty pcalte cweete'jrra', indyva Cristo dyi'pte yuuwesa yuune'nga.
 13Tyāa pa'ga andy yacjtjē'j pcalte wetewe'shte chich tyã'wësa's bagachte yujva ū'me'nja pcalte cweete'jya'mée.

Jesucristo jycaajnisat' ū'wa'ja's jyuca pëywa'j ji'pja'

9 1Andya' Jesus jycaajnisatewe'shtju, naa pa'ga sāl'jini's jyuca pëywa'j ji'ptju, tyāa pa'gatey cue'shtyi jype'jsa Jesusa's iiuytju, sa' tyajy tashte mjīitj atsa' andy mjīirra Jesus tashte cuutya'jnisa i'cue i'cue'sha'.
 2Vitesa andya's we'werra': Pablo' Jesus jycaajnisatewe'shme' jīsava ūsváatyna. Nava i'cue'sh yu' tyã'ljīya' ājameene'cue. Andya' Jesucristo jycaajnisatewe'shte írráa i'cue'sha' Jesucristo's nwëese'jsa i'cue andy pta'shte.

3Andyna nuywe'wesaty' na'wëtj pasu':
 4Andya' ū'wa'ja's jyuca pëjyya' ājawal'satj.
 5Ma'wëta Jesucristo jycaajnisawe'shva tyāawe'sh nyuuty pe'jrra sāl'jini fi'nze' vite' Jesus nyacj, Pedrowe'shva, atsa' andyrráa ¿quij yūurra tyã'wëy yūuya' ājamée yuquiti'tj?
 6Bernabé yacj

cue'sh e'nzsarráa váa Dyus yuwe's pta'shna u'jurrava ¿naa quiwete mjiia's nviitwa'jsamée ne'tca'w? 7 ¿Maa soldaurrá' sã'jnimée fi'nzegá'? ¿Quimga uutjash vitrra', cytee yünni's ü'we'tsmée? ¿Quimga cla taqui'jrrava tyãa claa lechi's tundy'i'tsmée? 8 Andy üusujrráa tyã'wë yajcyrra we'we'tsmeetj. Tyã'wëmeete íic Moises leyteva tyã'ji'. 9 Cyteea' na'wë fi'jni': Bueya's cmaaji'jitsrra', yuwe's tundwa'ljme' iüü' mjiicajn ji'c. Dyusa' tyãa bueyrráaty peeygãjrra tyã'wë we'weme', 10 wejyva cue'shtyi we'werrac tyã'ji', tyãa pa'gatey tyãa leya' cue'sh jiic yu' naa pa'ga. Tyã'wë uutjashsu mjiisa ma'c yuu meerra' quiwe's wuwsa ma'c yuu nava cytee mjiini's cutyi'jrra ü'we'nja süjnac mji'. 11 Tyã'wë yã'tje', cue'shva i'cue'sh cshavysu Dyus jii mjiisatja'w atsa' i'cue'sha' miijajcywe ¿cue'sh mjiipa'ga ü'wa'lj quijrráava jypa'gawa'lj ji'pjmeemtja'w? 12 Vite mjiisava ü'wa'ja's jypa'gane'ta atsa' ¿cue'sh yu' wejy tyã'wë jypa'gawa'jsameemtja'w?

Tyã'wërrava cue'sha' mjiipa'ga ü'wa'ja's iipëjymeetja'w, wejyva cue'sh peejini's wanta'i'tja'w, Cristo caapiya'jni's yupsá na'wë yuuya'mée. 13 I'cue'sha' jii i'cue dyuus yatte mjiisa' dyuus yatte ü' yacjtyi fi'nze'. Tyãawe'sha' na'wëty yu': altalte pu'chsa' cytee niimal icjni chicha'styi ü'we'. 14 Cristova tyã'wëyrráac jycaaja': Dyus yuwe pta'shsa tyãawe'sha' cytee sã'jini fi'nzewa'lj ji'pita' ji'c. 15 Nava andya' bagach yujva iipëjymeetj tyã'wë sã'jiwa'ja's, sa' i'cue'sh quijrráava peescajn tyã'jina fi'jatsmeetj. Quijva sã'jimeeteva wëttju fi'nze' na' tyã'wë i'cue'shtyi tjãasmey uuwa'jsatj.

16 Andya' Dyus yuwe's pta'shpa'ga iivejch yaaquitsmeetj, tyãa mjiia' andy jiime', Dyus ji' tyãa pa'ga. Atsa' Dyus yuwe's pta'shmeerra', wala yuj seena' yuuwesa yu'nja. 17 Tyã'wë ducj jytjãasrra mjii pacuevatsa', tyãa mjiipa'ga jypa'gawa'lj ji'ptju süju'nja. Nava tyã'wë yajcyrra mjiinisa yu'tsme'. Tyãa mjiia's Dyuscu üs, atsa' tyajy jycaajinrrá's cytey yuuwa'lj ji'ptju quijva ducj jytjãasmée. 18 Dyus yuwe's wët wechana pta'shni andy yacja' ducjni na'wësa', atsa' andy mjiipa'ga i'cue'sh yuutyi's ducj jytjãasu'tsmeetj.

19 Tyã'wë andya' ducj jytjãasmée üstju, atsa' andya's quim yujva jycaajwa'lj ji'pjmeeta'. Nava Cristo tashte nasa cuj nuypa'jya' süjrra yuurráatj selpisáa yuu jyucaysaty. 20 Bagachteva judiuwe'sh yacj üsrra', judiu na'wëytju yu', tyãawe'shtyi Cristo jii cnayya'. Andya' Moises leya's nwëese'jetsii yu' meerrava Moises leya's nwëese'lja yacj üsrra yu', tyãa leya's nwëese'lja na'wëytju yu', tyãawe'shtyi Cristo jii cnayya'. 21 Sa' vite nasa Moises leya's jiimeesa yacj üsrra', andyva tyãawe'sh na'wëyrráatj jiimeesa na'wë yuuna fi'nze' macue Dyus leya's yu' nvijtmée üsrrava, tyãa pa'gatey Cristo jycaajni'stju nwëese'lja fi'nze'. Nava tyãawe'shtyi Cristo jii cnayya'rráatj tyã'wë yü'. 22 Dyusa's achamée ew jiisa yacj üsrra', andyva tyã'wëy jiimeecuesa na'wëtj fi'nze'. Nasa ma'wëcuesate', andyva tyãawe'sh na'wëyrráatj fi'nze', tyã'wë yüute' maarráava ewte

neeyüuwa'ja's uyuváatyna sūjrra. ²³Tyāasatj quījteva jyuca tyā'wē yūuna fi'nze!, Dyus yuwe ewsa's vitetyva jytyujndeya!.

²⁴I'cue'sha' peecy jii i'cue wuwuurra cnay wēesa' cyanzíi ja'ndarrajty wuwu!, peeswa'lj ūsna tyā'sna cnayya!. Nava teehsa yuurráac cnayu!. Tyāa cnaysava ma'wēga chjächja wuwu!, i'cue'shva tyā'wēy myūuwe, peeswa'lj ūsna tyā'sna jypa'gaya!. ²⁵Maava wuwuurra cnay wēesa' tyāawe'sh cacue's caapiya'jna pjeu'ju'ty yatscjēy. Tyāawe'sha' naa quiwete corona ptsuwa'jsa's jypa'gaya'rráaty tyā'wē yū!. Nava cue'sha' bagachte yujva ptsuwa'jsame's jypa'gaya'tja'w tyā'wē pa'pchu!. ²⁶Andy tyā'wē yūutsrra!, ma'wē wuwuuwa'tjeva jiimée yu' wuwuume'nja. Andya' puiiya' jiimeesa na'wē fiisurráa ujcame'nja. ²⁷Tyā'wē yūuya'mée, andy cacue's caapiya'ja'tj. Tyā'wēme!, viterráaty ew caapiya'jrra!, caapiya'jsa andy yu' seelpimeesa yuuya'mée.

Dyus ityimeesaty neewe'wecajmen yu'cypejni

10 ¹Yacjtjē'jwe'sh miiyajcywe: nyafiitey cue'sh yatsgawe'sha' jyucay Dyus nwe'wena jype'jni tāapj apjnity fi'nzena ūsu!, sa' jyucay ícjwala bejuyva ew uycjēwtyi. ²Jyucay Moises yacj tyutemée fi'nzerra yuurráaty jyucay tāapj dyiite Dyus nwe'weni yuu, sa' tyā'wēy ícjuyva uycjēwtyi, ³sa' jyucaysaty Dyus sāl'jini fi'nzena ūsu!. ⁴Tyā'wēytyi jyucaysa Dyus yusni yu'a'sva tundyna fi'nzena ūsu!, sa' Dyusa' tyāawe'sh yacj ij dyi'tje pi'cyna u'juetsrra!, peñate yu' cutyi'jrra yuscu. Atsa' tyāa peña yu' Cristoc yu!. ⁵Tyā'wē Dyusa' ew yūuteva, nasa wejy cujsa yu' Dyus dyi'pte ew fi'nzemeeta!, tyāa pa'ga Dyus castigāyte uuty nasa u'pnimée quiwesu.

⁶Tyā'wē castigāyni uuty nava tyāa yu' cue'sh jypa'yajcyrra tyāawe'sh na'wēy ewmée yūucajmenrráac tyā'wē yūu. ⁷Tyāa pa'ga i'cue'sha' dyus ityimeesatyi' neewe'wenuwe, tyāawe'sh na'wē yu!. Tyāawe'sh dyus ityimeesaty neewe'weni's na'wēc pta'shi' Dyus libru!: Nasa' wechana fiesta'jya' tacjtyi ū'na tundyna jī'c. ⁸Tyāawe'sh na'wē ptamsamée canzh pcal yuuwa'lj ji'pjmeetja'w. Tyā'wē yūusa' uuty teech enterráa veintitres mil nasa. ⁹Cytee ūssa maaíi yu' Dyusa's juuna' ūuschawe'wety, atsa' tyā'wē we'wepa'ga ul weesweesa wa'cyte uuty. Nava cue'sha' juuna' we'wewa'lj ji'pjmeetja'w Dyusa's. ¹⁰Maaíi yu' Dyusa's atsewe'wety ewmeec yūu jīna. Atsa' tyā'wē we'wepa'ga, Dyus caajni angel tyāawe'shtyi' iviituc. Nava cue'sha' tyā'wē atsewe'wewa'lj ji'pjmeetja'w.

¹¹Tyāniitey cue'sh yatsgawe'shtyi tyā'wēc yūu, atsa' tyā'sa' Dyus librute fil'jnic neeyūu cue'shva jypa'yacy fi'nzeczajn, nmej ensa' utyaana u'juetsa' tyāa pa'ga. ¹²Tyā'wē Dyus yacj ew ūstju sūjna yaacysa' jypa'yacywa'ja' pcalte weteya'mée. ¹³I'cue'shtyi pcalte pētywa'jsa pa'ja'ne' tyā' u'sesa tjaacue seena' tjēysameeta!, jyucaysa tyā'wēsarrarráaty ji'pjusatja'w. Nava Dyusa's pi'quine'cue atsa' tyā' i'cue'sh wantāyaa' chjächjawa'ljmeesa yu'sa!

caavya'ja'lmeena, wejyva pcalte pētywa'jsa pa'jatspcachja', ma'wē tyāa pcaluj iyuwa'ja'sva ij pu'chjina Dyusa'.

¹⁴Tyāa pa'ga yacjtjē'jwe'sh, dyus ityimeesaty neewe'wenijū casejcajn yu'cypejni's mwēese'jwe: ¹⁵I'cue'sha' peecy jii i'cue andya' quij yuupa'ga ne'tca tyā'wē jycaaja' nava andy we'weni's mpa'yajcywe.

¹⁶Ūs miijajcywe: Cristo' uutsrra' tyajy eea's pcawcu atsa' tyāa uuni's caayaqui'jsa vasotewe'sha's jypa'garra oraī'tja'w. Tyā'wē yūunisa' Cristo yacj utyaarra tyāa yacj tyutemeetja'w fi'nze' jīnisa'. Tyā'wēy Cristo' uuya' tyajy cacue's ducjcu atsa' tyāa uuni's caayaqui'jsa pana's pe'l tenderra jytyunde'tja'w. Tyā'wē yūunisa' Cristo yacj utyaarra tyāa yacj tyutemēe ijtja'w fi'nze' jīnisa'. ¹⁷Macue wala cujrrava teech pana'srrāa jyucaysatja'w ū'we', tyāasatja'w teechrrāa na'wēsa yuuna pa'ja'.

¹⁸Miijajcywe Israelwe'shtyi. Tyāawe'sha' Dyusna wechaya' tajcy icjni chicha's ū'sa' Dyus yacj tyutemēe fi'nzesarraty tyā'wē yū'. ¹⁹Tyā'jīte', tyā'wē yūuya' tajcy icjnisa chichte quij pēttejene' sūjcajn tyā'jītsmeetj, tyāa pa'gatey dyus ityimeesa' quijva meesata'. ²⁰Tyā'wēteva, dyus ityimeesaty wechaya' tajcy icje'ty Dyus cielutewe'sha's jiimeesa', atsa' tyā'wē yūuni' dyus ityimeesarrāaty wechanisame', echtjē'ja's wechanisa'. Atsa' i'cue'sha' tyā'wē echtjē'j yacj utyaarra fi'nzenuwe jīrratj tyā'wē we'we'. ²¹Tyā'wē echtjē'j yacj utyaarra wechana ūsrra', Cristo puutsni mesatewe'sha's yu' jypa'gaya' ājameene'cue. ²²Cue'shtyi jype'jsa Jesucristo's caaūuscha'jwa'jsameetja'w cue'sha', tyāa pa'gatey tyāate jytjaacue chjāchjasameetja'w naa pa'ga.

Quijnava ū'ya' ājawa'jsatja'w, nava jypa'yacywa'ja' vitety peeygājrra

²³Isa cue'sha' quijjnava ū'ya' ājawa'jsa yujtja'w, nava jypa'yacywa'j jī'ptja'w. Macue quij ū'nava ū'ya' āja'nja'w nava tyā' Dyus yacj chjāchja fi'nzewa'j yu'sa' pu'chjī'tsmeeta'. ²⁴Peecy fi'nzewa'jrrā's yajcymēe, vitetyva peeygāawa'ja' ew cfi'nze'jya'.

²⁵Mercaute chich ma'wēsanava weyrra maa sūjmēe ū'wa'ja', ²⁶tyāa pa'gatey Dyus jīirrarāata' naa quiwe, tyā'wēy naa quiwete ūssa quijquijva jyuca.

²⁷Meerra' Dyusa's jiimeesa pi'cyte', i'cue'sha' u'jrra quij puutsteva tyā'sa' ū'werrāane'cue maa sūjmēe. ²⁸Nava Dyusa's achamēe ew jiisa' na'ljīna we'wena: Naa chicha' dyus ityimeesaty wechanisa' na' ewmeena jīte', indya' tyā'sa' ū'meene'nga, tyā'wē pta'shsa's caypumba'jya'mēe. ²⁹Vitesa ūs yaacyni's jypa'yacycajntju we'we', iindy ūs yaacyni's we'wetsmeetj.

Nava Dyusa's shiingmēe ew jiisa' na'wē pēyina: Andy quijjnava ū'ya' ājani's ¿quij yūurra vitesa neeweya' ājacy? ³⁰Andya' quij ū'wetsrrava Dyusa's wechana orāyrratj ū'we', atsa' andy ū'ni's ¿quij yūupa'ga ewmēe nuywe'wetyqui? jītyna. ³¹Ew yuja', nava i'cue'sh ū'nisa ma'c

yuu quĩj yũutsrrava Dyus dyi'pte selpiiwa'jsarrá's tjengrra cytey myũuwe. ³²Judiuwe'sh vite' judiumeesa, meerra' Dyus luuch maatyva caypumba'jwe'shte' mpa'yajcywe. ³³Andya' na'wẽrráatj pa'pchu': peecy wêt fi'nzewa'j yu's yajcymée, vitesaty pu'chwa'ja'srráatj pacuena fi'nze', tyãawe'sh ũusa' ewte neeyũucajn.

11 ¹Andyva ma'wẽtca Cristo fi'nzeni's tjengrra fi'nze', tyã'wëy i'cue'shva andy fi'nzeni's tjengrra mfi'nzewe.

U'ya' cultote jypa'yacywa'j ji'pja'

²Yacjtjê'jwe'shtyi wecha'tj andya's pechcanamée yajcyrra andy caapiya'jnityi' cytey yuuna fi'nzepa'ga. ³Nava na'wësa'sva mjiyuwe: Cristo' Dyusa's nwëese'jsa', atsa' pitstjê'jwe'sha' Cristo's nwëese'jwa'jsata', atsa' u'ywe'sha' nmi'ty nwëese'jwa'jsata'. ⁴Tyã'wë yũuwa'jsarra'j maa pitstjê'jwa chua'a's qui'pmée cultote orãyna Dyus yuwe's pta'shna ũsrra', Cristo's weechsa yuuni'. ⁵Tyã'wëy maa u'yva dyictje's ya'patjmée orãyna Dyus yuwe's pta'shna ũsrra', tyajy nmi'a's weechsa yuuni'. Tyã'wë ya'patjmeete', dycjasa's cwaaca'jni na'wësa'. ⁶U'ya' tyã'wë ya'patjetsmée yã'jrra', teejwend dycjasa's tee cwaaca'j. Nava u'y tyã'wë dycjasa's cwaaca'tje' tjaamewechte', tee ya'patj tyajy dyictje's. ⁷Pitstjê'ja' dyictje's ya'patjwa'jsame', tyãa pa'gatey Dyus wendyrrac tyãa na'wëysa vit, tyajy jycaajnyity nwëese'jwa'jsa. Naapcachja' u'ya' pitstjê'j jycaajnyity nwëese'jwa'jsa'. ⁸Dyusa' pitstjê'ja's taqui'jitsrra', u'y cacuejuwe'sha's cutyi'jrra pjeu'jme', wejyva pitstjê'j cacuejuwe'sha's cutyi'jrrac u'ya's pjeu'j. ⁹Pitstjê'ja' pu'chwa'jsa peejycu yu', tyãa pa'garráac u'ya' pjeu'jni yuu. U'y tyã'wë pu'chwa'jsa peejyte pitstjê'ja's pjeu'jni yuume'. ¹⁰Tyãa pa'ga u'ya' pitstjê'ja's nwëese'jwa'jsa' jĩni dyictjete ya'patjnisa ji'pjuwa'ja'. Tyã'wë ya'patjwa'jsarra'j cytey yuumeete', Dyus angeleswe'sh tjengna ũsta'. ¹¹⁻¹²Tyã'wëteva, ew ũus yajcyte yu', maa yujva tjaacuesameeta', tyãa pa'gatey pitstjê'jvatsva u'y cacuetemée peecyrráa yu' naa quiwete upyya' aja'tsme', tyã'wëy u'yva pitstjê'j ji'pjmée peecyrráa yu' naa quiwete upyya' aja'tsme'. Isa yuja' u'ya' pitstjê'j cacuejuwe'sha'scu pjeu'jni yuu, tyã'wëy pitstjê'jwa u'y cacuetec upyya' aja'. Tyãasa maa yujva tjaacuesamée, e'nzĩ Dyus pjeu'jnirráata'.

¹³Tyã'wë' naa pa'ga i'cue'sh pwe'sh ũus miiyajcywe, aan ewna tyã'wë Dyusa's orãitsrra u'ya' dyictje's ya'patjmeete. ¹⁴Pitstjê'ja' peecy yuu dycjas jyul'j ji'pjuwa'jmeesarra tyã'wë cju'ja'tje', tjaame yuja'. ¹⁵Nava u'y tyã'wë dycjas jyul'j ji'pjte', zhichcuesa'. Tyãa pa'gatey dyictje's apjwa'jĩrráac dycjas jyul'j nviitni yuu. ¹⁶Nava maái yu' dyictje's ya'patjwa'ja's jycaajni's wa'lsa ũsrra', peecy ũus yaacywa'j ji'pja'. Tyã'wëme' cue'sh vite' Dyus luuch msuuwe'sh maa yujva jiimeeta' dyictje's ya'patjmée Dyusa's orãyni yu's.

Ewmée yūuya'rráa Santa Cena's ū'ya' pcjaacjeni

¹⁷Na'wēsana pta'shna fi'jatsrra', i'cue'sha' ew yūusa i'cue jīna wechaya' āja'tsmeetj. I'cue'sha' Dyusa's wechaya' pcjaacjeni' selpiipcachte, wejy suwsarrána sūju'tj. ¹⁸I'cue'sha' Dyusa's wechaya' pcjaacjetsrra', bagachteva i'cue'sh pwe'sh puuty fiifii tyuteeya'rráaty pcjaacje' jī'ty atsa' tyā'wē pta'shni' isa yujna sūju'tj. ¹⁹Pcjaacjesa i'cue'sh pwe'sh tyā'wē fiifii tyuteni' ew yujna, tyajírráa mtee pcjaacjesa wejy Dyus yacj ew fi'nzesateva ya'jiyuna. ²⁰Nava Jesucristo mesatewe'sha'stja'w jypa'ga' jītsrra tyā'wē fiifii tyuteerra ūsni' tyā' Dyus jytjāasnime'. ²¹Tyāa pa'gatey i'cue'sha' ij pcjaacjerra ja'ndarra'j ū'wa'j en ājatspcachja', puuty fii tyuteerra maafi' yu' yatste ū'we'i'cue, vite jīi yu' nvijtmée. Atsa' viterráa tyicpcach meerrava tūunus tundyte', vite yu' ū'wa'j jipjmeety wēena neeyū'. ²²Tyā'wērráa yūtsrra', i'cue'sh yat-suyva ū'wa'jna. Tyā'wēme', vite ū'wa'j yu' nvijmeerra', cyūusu'ju'i'cue, atsa' puuty yaatsenirráac caseje'. I'cue'sh tyā'wē yūuna ūste', andya' i'cue'shtyi' ew yūuna ūsi'cue jīna ¿wechaya' ājama'tj? Na'wērráa yūute', wechaya' ājame'nja.

Santa Cena's ū'wa'ja's Cristoc caapiya'jrra nvijt

²³Andya' i'cue'shtyi' caapiya'tj nava Jesucristo andya's ma'wē caapiya'tje' tyā'wēyrráatj caapiya'j tyā' na'wē': Jesusa's icjcajn ducjwa'j cus ājatste', tyāa cusutste pana's cusete jypa'gac. ²⁴Sa' Dyusa's wechana orāyrra', pe'ltenderra na'jīc: Mē'we. Naa pana' andy cacue's i'cue'sh pa'gate pe'ltendenisa na'wēsa'. Tyā'wē myūuwe andy pytjaa yuurra uuni's bagachteva yajcyya'. ²⁵Ū'na jyā'jrra', tyā'wēy vaso's jypa'garra na'jīc: Andy eea's pcawrra yuurráa i'cue'shtyi' nwe'wewa'ja's Dyusa' u'se pjeu'jrra nvijtcu. Atsa' naa vasotewe'sha' andy ee i'cue'sh pa'gate uwusáa na'wēsa'. Tyā'wē tundy iisa andy pytjaa yuurra ee pcawni's bagachteva caayaqui'jwa'jsa' jīnac caapiya'j. ²⁶Tyā'wē yā'tje', bagachteva naa pana's ū' iisa, naa vasotewe'shna tundy iisa i'cue Jesucristo uuni's yajcyna nes yu', tyāa shawendna quījpcach.

Santa Cena's jypa'gaya'varra' na'wē yūuwa'ja'

²⁷Tyā'wē maava Jesucristo caapiya'jni's quījvameesa na'wē Dyusa's yajcymée maa sūjmée vaa pana's ū'na vasotewe'shna tundiityna atsa' tyā'wē yūusa' pcalte wetesá yuutyna, tyā'wē Jesucristo cacue vite' tyajy ee na'wēsa's quījteva seelpimeesa na'wērráa yūupa'ga. ²⁸Tyāa pa'ga ūus miiyajcywe teeche na'wērraj pan vite' vasotewe'sh tyāaty jypa'gamey. ²⁹Tyā'wēme' nuste wetewa'ja's peequí pacuesáa yuutyna, tyā'wē Jesucristo cacue vite' tyajy ee na'wēsa tyāaty quījteva seelpimeesa na'wē maa sūjmée jypa'gapa'ga. ³⁰Tyā'wē jypa'yacypa'gamée i'cue'sh cshavytewe'sh maafi' yu' ātsa'na chjāchjamée ūsta', naapcachja' vite' uuna ūsta'. ³¹Peequí wala

jypa'yacyna fi'nzevatsa', tyā'wē ñuste wetewal'j en pa'ljmeena. ³²Nava Dyusa' cue'shtyi peeygājrrac castigo caja', qui'quin tyā'sna pacuete', bagachte yujva Dyus yacj puuty uywa'ljmeesawe'sh yacj caajya'mée.

³³Na'wē' atsa' āchja' andy yacjtjē'jwe'sh, Jesucristo mesatewe'sha's ũ'ya' pcjaacjtsrra', teehsa na'wērraj puuty ya'peeygājna ja'ndarraj ũ'ya' müytjaswe. ³⁴Maafí yu' wala wēesa ũsrra', tyajy yatte ũ'wena, tyā'wē puuty ya'peeygājmeé pcjaacjete', Dyus castigāywe'shte. Vite yuwe ũsta' tyāatyi's andy pa'ljrra pjeu'ju'nja.

Dyusna selpiiwa'ja's Dyus Espiritu' nasa iisa fiyfiyrraj ũsni

12 ¹Na'wē Dyus Espiritu' nasa iisa fiyfiyrraj Dyusa's selpiiya' ājawa'ja's ũsu'c tyā'sna pta'shya'vatj, atsa' yacjtjē'jwe'sh jypa'yacy mwēese'jwe.

²I'cue'sha' ew jii i'cue Dyusa's jiyumeyrra', naa quiwete dyus ũtymeekaty i'cue nwēese'jna fi'nze'. ³Tyāa pa'ga āchja' ew mjiiyuwe: Jesusa' seena' ewmeesa' jīna atsewe'wesa' Dyus Espiritu' cwe'we'tje we'wesameena. Sa' tyā'wēy Jesusa' andyna jype'jsa' jīna we'wemeena quim yujva, tyā'wē Dyus Espiritu' cwe'we'jmeete yu'.

⁴Quijva yūuya' ājawa'l' ũsta', atsa' nasa' tyāaty jypa'gatyna. Nava tyāa ājawa'ljty ũssa yu', Dyus Espiritu' teehrrá'. ⁵Ma'wēva selpiwa'l' ũsta', atsa' nasa iisa macue fiyfiyrraj selpiitsrrava, teeh Dyusrráanatja'w selpi'. ⁶Ma'wēva fiyfiyrraj mjiiwa'l' ũsta', nava teeh Dyus yuurráac fiyfiyrraj mjiiwa'l' sva caapiya'ja'. ⁷Nasa iisa fiyfiy selpiwa'l'ja's Dyus Espiritu' jyucaysaty peesu'scu, nasaa nwe'shtyi pu'chna fi'nzeczaj. ⁸Dyus Espiritu' maafítyi' Dyus yuwe's jypumbamée jiyuya' ājawa'l'ja'scu ũsu'. Tyāa Espiritu' írráa maafítyi' ma'wēva yu'cypejya' ājawa'l'ja'scu ũsu'. ⁹Tyāa Espiritu' írráa maafítyi' Dyusa's ũuste jypumbamée yaacywa'l'ja'scu ũsu'. Vitetyi's ātsa'saty nuychjāachjawa'l'ja'scu ũsu'. ¹⁰Maafí yu' quim yujva ājanimeesa's ājawa'l'ja'styi jypa'ga'. Sa' vitetyi's Dyus quij yūuya'vateva dyiicjēy jiyurra pta'shya' ājawa'l'ja'scu ũsu'. Vitetyi's maa tyā'wē Dyus Espiritute', vite' maa Dyus Espiritumeeteva jiyuwa'l'ja'scu ũsu'. Atsa' vite' jypa'ga'ty yuwe fiysaju we'weya' ājawa'l'ja's, naapcachja' vite' tyāa yuwe fiysaju we'weni's āate pta'shya' ājawa'l'ja'styi jypa'ga'. ¹¹Nava tyā'wē nasa iisa fiyfiy selpiiya' ājawa'l'ja's ũssa' Dyus Espiritu' teeh yuurrá'. Tyāa yuurráac teehsa na'wērraj quij mjiiya' ājawa'l'sateva tyāaty ũsu'.

Jyucaysa teehsa cacuetewe'shrrarráatja'w

¹²Cacueva ma'wē teehrráarrava cuj jwend jipjna fiyfiysa, atsa' Cristova tyā'wēysa'. Macue cuj jwend fiyfiysarrava, cyanzii teeh cacuetewe'shrráata'. ¹³Dyus Espiritu' tyā'wē cue'sh ma'wēsatyva Cristo tashterraráa cuutya'tje', teeh cacuetewe'shrráatja'w yuu. Judiu ma'c yuu meerra' judiumée ma'c yuu, selpiisáa ma'c yuu meerra'

selpiisamée ma'c yuu nava tyāanzcuēesay Dyus Espiritu teechrráa ūsa' tyāarrarrá'stja'w jypa'ga' jyucaysa.

¹⁴ Cacue' teech jwendsa yacjrráa cacue yuuna pa'ja'tsme'; wala kuj jwend ji'pja'. ¹⁵ Chinda' we'wevatsa', na'ljina: Andya' cusemeetj, sa' tyāa pa'ga cacuetewe'shmeetj jina nava tyā'wē cusemeerrava cacuetewe'shíírrá'. ¹⁶ Meerra' tjū'wē' we'wevatsa', na'ljina: Andya' yafymeetj, sa' tyāa pa'ga cacuetewe'shmeetj jina nava tyā'wē yafymeerrava cacueteywe'shíírrá'. ¹⁷ Tyā'wē cacue' jyuca yafyrrarráavatsa', ¿ma'wē wēse'jya' ājacytja'w? Meerrava cacue' jyuca wēse'jnisarrarráavatsa', ¿ma'wē jyputaya' ājacytja'w? ¹⁸ Nava Dyusa' cue'sh cacuetewe'sh kuj jwendcu qui'p, qui'jrajne' peejy yu' tyāaty' jyuca. ¹⁹ Teech jwendsarráavatsa', ¿ma'wē cacue' selpiiya' ājacy? ²⁰ Tyā'wē cacuetewe'sha' kuj jwendsarrava teech cacueterrarráaty jyucaysa selpi'.

²¹ Yafya' cuse's we'werra': Indya'sa' jypeejymeetj ¿jīya' ājama'c? Tyā'wēy dyictjeva chindaty we'werra': Indya'sa' jypeejymeetj ¿jīya' ājama'c? ²² Tyā'wēmée wejyva cacuetewe'sh qui'teva seelpimeesa na'wērrava, tyāaíírráa jytjaacue jypeejysata'. ²³ Cacuetewe'sh jytjaacue yu' peejinimeesava ūsta', macue tyā'wēteva tyāatyva jypa'yaqui'tja'w. Sa' tyacue zhichcue pjeu'jna jype'jwa'jmeesa'sva ewtja'w pjeu'ju', jytjaacue yu' peejymeesa na'wēsateva. ²⁴ Dyusa' tyā'wēc jwee peejymeesa na'wēsatyva qui'pna cacue's pjeu'j, tyāaíírráa jytjaacue selpiwa'jsa. ²⁵ Tyā'wē cacuetewe'sha' puuty yajtsemée cyaanzcuēy ja'ndarraj puuty ya'pu'chwa'jsata'. ²⁶ Cacuetewe'sh teech jwendsa pytjaa yuutste', viteva jyucaysa nūs pu'chji'ty. Cacuetewe'sh teech jwendsa peeygāani yuutste', viteva wechwechaty yaacy pu'chji'.

²⁷ Achja' mjiyuwe: i'cue'sha' nasa iisa teechsa na'wērraj Cristo cacuete selpiisáa i'cue. ²⁸ Tyāa pa'gac Dyusa' tyajy luuchtyi' fiyfiy selpiwa'ja's peesu's teechsa na'wērraj: Nyafytewe'sha' Cristo jycaajnisawe'shtyi yuu. E'stewe'sha' Dyus qui'j yūuya'vateva dyiicjēy jiyurra pta'shwa'jsaty nviitni yuu. Tecjtewe'sha' caapiya'jwa'jsaty nviitni yuu. Tyajū' quim yujva ājanimeesa's ājawa'jsaty nviitni yuu. Naapcachja' vite' ātsa'saty nychjāachjaya' ājawa'jsaty nviitni yuu. Vite' qui'terráava pu'chya' ājawa'jsaty nviitni yuu. Vite' jycaajwa'jsa nviitnity yuu, naapcachja' vite' yuwe fiysaju we'weya' ājawa'jsaty nviitni yuu. ²⁹ Jyucay yu' Cristo jycaajnisatewe'sh yuumeeta'. Jyucay yu' Dyus qui'j yūuya'vateva dyiicjēy jiyurra pta'shsa yuumeeta'. Jyucay yu' caapiya'jsa yuumeeta'. Jyucay yu' quim yujva ājanimeesa's ājawa'jsa yuumeeta'. ³⁰ Jyucay yu' ātsa'saty nychjāachjaya' ājawa'ja's jypa'gasa yuumeeta'. Jyucay yu' yuwe fiysaju we'weya' ājawa'jsa yuumeeta'. Jyucay yu' tyā'wē yuwe fiysaju we'weni's āate pta'shya' ājawa'jsa yuumeeta'. ¿Tyā'wē meetyna' vacy? ³¹ Selpiiya' ājawa'j maarraj wejy tjaacue peejysatyna tyāaty mpaacuewe. Nava andya' tyāate jweeíírráa tjaacue peejysa's pta'shya'vatj.

Peeygāanisa yuurráa quĩjteva tjaacue walasa'

13 ¹Andya' macue seena' wala zhichcue we'weya' jii yu'nja naa quiwete nasa walasa na'wē, tyā'wēy angeleswe'shte ja'nda, nava peeygāawa'lj yu'sa' ji'pjmée yu'nja atsa' andy we'weni' quĩjte yujva selpiimeena. ²Dyus quĩj yūuya'vateva dyiicjēy jiyuya' ājawa'ja's ji'pj yu'nja, sa' quim yujva jiyunimeesa quĩjqũjnava jyuca jiisa yu'nja, sa' tyā'wēy Dyusa' pu'chjina sũjwa'lj yuurrá's ũuste yajcyrra vits walatyva fiite qui'pya' ājawa'ja's ji'pju'nja, nava peeygāawa'lj yu'sa' ji'pjmée yu'nja atsa' macue tyā'wēsarrava quĩjte yujva seelpimeesa yu'nja. ³Tyā'wēy andy ji'pjuni's quĩjqũjnava jyuca jytyuunde'nja, sa' andy cacue yujnava cambcajn ducjma'tj, nava peeygāawa'lj yu'sa' ji'pjmeete', cyul yuj tyā'wē ya'yuuna.

⁴Maava peeygāawa'ja's ji'pjsa', ũuscha yaaqui'tsme', maa yacjva jyuca ewsa', maa yujtyva atse'tsme', iwejch yaaqui'tsme', iwejch we'we'tsme', ⁵vityety juuna' yū'tsme', peecy wēt fi'nzewa'lj yu's pacue'tsme', ũuscha'tsvame', atseyaaqui'tsme'. ⁶Pcalte vite weteetste', tyāawe'shtyi npeevyshijcana wecha'tsme', naasáa ew fi'nzenirrá'scu wēt wēt yajcyna wechá'. ⁷Macue quĩjva tjēysa pa'tjeva ũucj yajcymée peeygāawa'jrrá's ji'pjrra' jyucac wantaí', Dyusa' pu'chjina sũjna.

⁸Dyus quĩj yūuya'vateva dyiicjēy jiyurra pta'shna fi'nzenisa' ptsuwa'lj en ājana, atsa' peena yu' tyā'wē yūuwa'lj peejymée yuuna, atsa' yuwe frysajuva ya'we'wemeena. Quĩjteva jyuca jii'tj sũjnisava ptsuuna. Nava peeygāanisa yu' bagachte yujva ptsumeena. ⁹Tyāa ptsuwa'ljsa le'chcuesarráaty jypa'garra ji'ptja'w, tyāasatja'w jyuca pta'shya' yu' āja'tsmée. ¹⁰Nava quĩjteva peejymée jyuca jiyuwa'lj en ājte', tyāa ptsuwa'ljsa le'chcuesaty ji'ptja'w tyā' scjēuutyna.

¹¹Andya' luuchteya' jiiimée luuch we'wenirráaty'tju we'we', sa' luuch ũus yaacynirráaty'tju ji'pju', sa' luuch na'wērráatj jii fi'nze'. Nava jyuca tjē'jsa yuuna cājrra', luuch na'wē jiiimée fi'nzeni's nvijttju. ¹²Tyā'wēy fírráatja'w āchjii yu' ew jiyu'tsmée, chji'ndyete speejute tjengte ma'wē pshūurráa vyaacy tyā'wērráatja'w uyu'. Nava quĩjte yujva peejymée jyuca ew jiyuwa'lj en ājte', seena' ew puuty pdyi'p āate uyu'nja'w. Āchjii yu' jyucamée le'chcuerráa jii'tj. Nava tyāa jyuca jiyuwa'lj en ājte', quĩjte yujva peejymée jyuca jiyu'nja Dyusva ma'wē andya's ew jiina tyā'wēy. ¹³Cjĩ'jii pta'shtju tyāarráa ptsuute', na'wēsa tecj ũsta' tyāa yu' bagachte yujva scjēwwa'lsameeta': Dyusa' pu'chjina sũjna yaacynisa, vite' Dyus yacj puuty uywa'lja's ũytjasna fi'nzenisa, vite' peeygājna fi'nzenisa. Nava tyāa tecjsaty cysustju tyāate tjaacuesa' peeygājna fi'nzenisa'.

Yuwe fypsaju we'weni' nasaty' selpi'tsme'

14 ¹Nyafyte' peeygāawa'ja's cjuē'y wejy tjaacue mpa'pchuwe. Tyāa e'su mpaacuewe ma'wē selpiwa'ja'sva Dyus Espiritu ūsu'c tyāaty. Nava i'cue'shtyi Dyus we'weni's pta'shya' ājanisarrāa wejy seelpisa'.

²Tyā'wēme!, maava yuwe fypsaju we'wesa' nasa yacjmée, Dyus yacjrrāa ne! we'we' jiyuwa'jmeesa's Dyus Espiritu cwe'we'jni, atsa' quim yujva jiyu'tsmeeta'. ³Naapcachja' i'cue'shtyi Dyus we'weni's pta'shsa', naa quiwete nasaty caajiyu'ju'c Dyus yacj chjāchja fi'nzewa'ja's vite! ūuste fi'nzetsteva cviisha'jna. ⁴Yuwe fypsaju we'wesa' peequírrāc Dyus yacj chjāchja fi'nzewa'ja's ya'jypa'ga'. Nava Dyus we'weni's vitety pta'shsa', Dyus luuchtyi chjāachja'jsa'.

⁵Yuwe fypsaju we'weya' jyucaysa ājavatsa', wala yuj ewna sūju'tj andya'. Nava Dyus we'weni's vitety āate pta'shya' ājani'stju wejy tjaacue jytjāasu'. Tyā'wē yūunisarrāa tjaacue ewsa'. Meerra' tyā'wē yuwe fypsaju we'wesa ūste!, pucate vite āate caajiyu'tje yu' ew yujna, tyā'wē yu' Dyus luuch jiyutyna Dyus yacj chjāchja fi'nzewa'ja's.

⁶Yacjtjē'jwe'sh, ūus miijajcywe: Andy pa'jrra yuwe fypsaju we'wete', i'cue'sha' ¿quijrrā' jiyuya' ājama'cue? tyā'wē cue'sh we'wenimée yuwejurrāa we'wete'. Nava Dyus we'weni's pta'shittersra', cue'sh we'weni yuweju caapiya'jna āate caajiyu'tje yuurraa i'cue'sha' ew jiyune'cue Dyus jycaajnyty.

⁷Na'wēsaty miijajcywe: música tucanisa cuyy vite' cytala tyāaty ma'wēva csuusu'tje!, ya'jiyumeena mem ma'wēsa's tucatsteva. ⁸Tyā'wēy guerrate puiiya' u'jwa'ja's ew caajiyu'jna corneta's āate tujcameete!, quim yujva jiyumeerra' pjeu'jmeetyna puiiwa'ja's. ⁹I'cue'sh yacjva tyā'wēyrrā'. Yuwe fypsaju we'wete!, ¿ma'wē ya'jiyucy quij we'wetsteva? Ya'jiyumeena atsa' cyul yuj yuuna. ¹⁰Isa naa quiwete' yuwe ma'wēsava ūsyujta'. Nava maa yujva tyāawe'sh pwe'sh puuty we'weya' ājanimeesa yu' meetyna. ¹¹Maava andy yacj we'wetsrra', andy we'weni yuwe jiyunisaju we'wemeete!, tyāa yacja' puuty we'weya' ājame'nja nasa fiysa na'wē. Atsa' tyāava andy yacj puuty we'weya' ājameena nasa fiysa na'wē. ¹²Tyāa pa'ga i'cue'sha' nacue wala quijya'va ājawa'ja's pacue'i'cue na' Dyus luuchtyi chjāachja'jwa'jsarrā's mpaacuewe.

¹³Tyā'wē yā'tje!, yuwe fypsajurrāa we'wesa' Dyusa's mpi'cywe tyāa yuwe fypsaju we'weni's nasaty āate caajiyu'jya' ājaya'. ¹⁴Tyā'wē yuwe jiyunimeesaju Dyusa's orāyrra', ūuste yu' Dyusa's yajcyna tyā'wē ya'yuuna, nava quij we'werrava tyāa yu'sa' ya'jiyumeena. ¹⁵Tyā'wēte!, ¿ma'wē wejy ewqui? Ūusterrāa Dyusa's yajcyna tyā'wē yūumée, quij we'wetsrrava tyā'snava jii tyā'wē yuuní wejy ewna. Meerrava Dyusa's yajcyna memuutsrra', tyā'snava yuwe jiyunisaju memwa'jna. ¹⁶Indya' tyā'wē yuwe jiyunimeesajurrāa Dyusa's wechana tuutje'jene'nga atsa'

nasa jiimeecuesa cyte üssa' indy yacj ja'nda Dyusa's wechana tuutje'jya' ãjameetyna, quĩj we'wetsteva jiyumeerra'. ¹⁷Dyusa's wechana orãyni' indy yacj yu' wala yuj ewna, nava vite yu'sa' selpiimeena. ¹⁸Dyus pu'chte andya' vite yuwe fysaju we'weya' i'cue'shte jytjaacue jijtj. ¹⁹Nava yuwe jiyunimeesaju wala jyu'lj we'wena üs na'wẽ', wejyva Dyus luuch cshavyte üsrra', yuwe jiyunisaju jyu'jmeecuerrãa caapiya'jna we'wevatsrrãa ewna sũju'tj.

²⁰Yacjtjẽ'jwe'sh, luuch le'chcuẽ na'wẽ yuuna fi'nzenuwe. Naasãa ewmẽe yũuwa'lj yuurrã's quĩj yujva yajcymẽe mfi'nzewe luuch le'chcuẽ na'wẽ. Nava jypa'yacy fi'nzewa'lj yu's tjẽ'jsa na'wẽ ew yajcyna mfi'nzewe. ²¹Yuwe fysaju we'weni' tjaacue selpiwa'jme's Dyus librute na'l'j'c: Vite ajũwe'shtyi cwe'we'je'nja yuwe jiyunimeesaju naa nasaty pta'shna. Nava macue tyã'wẽ yũuteva, nwẽese'jmeetyna jĩ'c. ²²Tyã'wẽ yuwe jiyunimeesaju we'wenisa' Dyusa's wechsawe'sh Dyus üsyujna sũjna caayaqui'jwa'jsarrã', sa' Dyusa's jiiyã'jsawe'sh jii me'. Naapcachja' Dyus we'weni's pta'shya' ãjanisa', Dyusa's jiisa üstyna tyãawe'sh jiierrã'. Dyusa's wechsawe'sh jii me'.

Quĩj yũutsrrava teech teechrraj we'wewa'ja'

²³Tyãa pa'ga Dyus luuch jyucaysa pcjaacjerra cyanzĩi yuwe fiysa yacj susna üste', maafĩ yu' Dyus Espĩritu cwe'we'jniteva jiimeesa cũjrra', luucu yuuna üsta' ¿jĩmeema'c? ²⁴Nava jyucaysa Dyus we'weni's ãate pta'shna üsune'cue atsa' maafĩ yu' ecajuwe'sh cũjrra üssa' jiyuna tyajy pcalte fi'nzena üsni's, i'cue'sh tyã'wẽ Dyus we'weni's ãate pta'shna üspa'ga. ²⁵Tyãa pa'gatey i'cue'sh ãate we'weni' tyajy üus yaacynityi' cpaaquityna, atsa' quũitsjurra Dyusa's na'l'jina wechaana: Dyusa' isa i'cue'sh yacj yuj üsu'ga jina.

²⁶Tyã'wẽ yã'tje', na'wẽ myũuwe yacjtjẽ'jwe'sh: i'cue'sh yacj pcjaacjena üssa maafĩ yu' Dyusa's wechana memwa'lj vãa ji'pjtyna, vite' caapiya'jwa'lj vãa ji'pjtyna, meerrava Dyus we'weni's vãa caajiyu'jwa'lj ji'pjtyna. Naapcachja' vite' yuwe fysaju vãa Dyusa's wechawa'lj ji'pjtyna, meerra' tyãa yuwe fysaju we'weni's vãa ãate pta'shwa'jsa üstyna, atsa' tyã'wẽ yũuteva, ew yujna Dyus luuchtyi selpiwa'jsate yu'. ²⁷Yuwe fysaju we'wetsrra', e'nz meerra' tecj cyanzrrãa we'wewa'ja' teech teechrraj. Nava tyãa yuwe fysaju we'wenisa's ãate caajiyu'jwa'jsa üsterrãa tyã'wẽ yũuwa'ja'. ²⁸Nava ãate caajiyu'jwa'jsa quimva meete', yuwe fysaju cuch we'wenuwe tyãa pcjaacjenite. Cyãanpasa' yuwe fysaju Dyusa's wecha wẽjetsrra', iindy üusterrãa wechana mneeyũu. ²⁹Meerra' Dyus we'weni's pta'shwa'lj vãa yuuna nava e'nz tecj cyanzrrãa mwe'wewe, naapcachja' wẽse'jna u'psa' jypa'yacy wẽse'jetyna Dyus we'weniteva jiyuya'. ³⁰Meerrava wẽse'jna u'psa's Dyus we'wevãana pta'shcajn, atsa' yatste we'wesa jyã'jpcach üytjasrra we'wewa'ja'. ³¹Tyã'wẽ Dyus

we'weni's jypa'gasa' jyucay pta'shya' ājane'cue, nava vite we'wena jyā'jpcach ūytjasrra teech teechrraj. Tyā'wē yūute!, jyucaysa piyarra Dyus dyi'pte wejy chjāchja fi'nzene'cue. ³²Tyāa pa'gatey Dyus we'weni's jypa'gasawe'sha' tyāawe'sh ūus yaacyni's jypa'yacywa'ja', ma'wēva ūusutjeni's we'wemée. ³³Tyā'wēme!, Dyusa' tyā'wē caypumba'jna susna ūswa'jsame!. Ma'wēta Dyusa's yaacysa msuuwe'shva susmée fi'nze!, tyā'wēy fi'nzewa'ja'.

³⁴U'ywe'sha' pcjaacjena ūsni cultote! paapējyina susna ūswa'j ji'pjmeeta!. Tyā'wē yūumée, jypa'yacy wēse'jwa'j ji'pjta' culto qui'putste!, Dyus ley ma'wē jycaatje! cytey yuuna. ³⁵Quij paapēywa'j ji'pjrra!, yatsu pa'jrra tyāawe'sh nmi'ty pēyityna. Wej yujva ewme! u'ywe'sh tyā'wē cultote susna ūste!.

³⁶I'cue'sha' iwejch yajcyna ma'wēva yuuwa'j ji'pjmeei'cue. Tyā'wē yuucajmenī Dyus yuwe! i'cue'sh tashu nyafyrraj casejme!, atsa! i'cue'shrrāa Dyus yuwe's jiisa ūsmeei'cue. ³⁷Na'wē we'wena fi'ljatstju tyā! Dyus jycaajni'ta!, atsa! Dyus we'weni's jiyusa ūsvá'cue meerra! Dyus Espiritu caaūusutje'jni's jypa'gasa ūsrra!, peecy mjiyuwe. ³⁸Nava tyā'wē jycaajna fi'ljnityi! cytey nwēese'jmeena atsa! tyāa nwēese'jsame's jypa'gameete ewna.

³⁹Yacjtjē'jwe'sh, na'wē myūuwe: Dyus we'weni's āate pta'shwa'jrrā's wejy miiyajcywe. Nava yuwe fiysaju we'weni's yup yu! meerrava, ⁴⁰cultote quijva susmée zhichcue teech teechrraj we'wena meswe.

Jesucristo qui' ĩtyi yuuni

15 ¹Āchja! na'wē Cristo yuwe ewte nviitwa'jsa's pta'shtju tyā! ma'wēsateva ew caajiyu'jya'vatj yacjtjē'jwe'shtyi. I'cue'sha' tyāa pta'shni's jypa'garra tyāajū tyutemée ūsi'cue. ²Tyāa Cristo yuwe ewsapa'ga i'cue'sha' nwe'weni ewte neeyūuwa'jsai'cue, andy pta'shni's cylumerrāamée ūusuj jyuca jypa'garra yu!.

³Cristo yuwe ewte nviitwa'jsa jīni's andyna ma'wē caapiya'tje! i'cue'shtyiva tyā'wēyrrāatj caapiya'j tyā! na'wēc yu!: Dyus librute ma'wēne! fi'ljni ūsu! atsa! tyā'sa' cytey yuuna Cristo! cue'sh pcalsa pa'gate uuc. ⁴Tyājū! pendaniic yuu nava tecj ente! qui' ĩtyi yuuc, Dyus librute ma'wēne! fi'ljni ūsu! tyā'wēy. ⁵Qui' ĩtyi yuurra!, Pedro's vyaac. Tyājū! vite tyajy jycaajnisata docesatyva vyaac. ⁶Tyāa e'su! yacjtjē'jwe'sh quinientos tjaacuety ūsu! teech ajte tyāatyva vyaac, atsa! tyā'wē uysá! wala cuy nee ĩtyiyta! macue vite! yu! uuteva. ⁷Tyāa e'su qui' vyaarra!, Jacobo'scu vyaac, sa! tyajy jycaajnisatyva qui' vyaac jyucaysaty.

⁸Nmejte! andynava vyaac, andya! en ājmey upsa seelpimeesa na'wēsateva. ⁹Tyāasa andya! Jesus jycaajnisatewe'sh vite yacj yu!, wala ājmecuesatj, sa! Jesus jycaajnisata na'wē yuuva ya'cysuswa'jmeesatj, tyā'wē Dyus luuchtyitj ajtsena fi'nze naa pa'ga. ¹⁰Macue tyā'wēsateva,

Dyusa' andya's peeygājrra tyjityjcu tyajy peeygāani' cyul yuume' andy yacj. Tyā'wēsarrava andytju vitesate wejy jytjaacue mjii. Nava ew yajcyte yu' tyā' andyrrāa mjīnisa yu'tsme!, Dyuscu andya's peeygājrra tyutemée ūsu' tyāa pa'garrāatj tyā'wē mjii. ¹¹Nava tyāa yu' quij yuumeena, Jesus jycaajnisawe'sh ma'ty jytjaacue mjii, meerra' andy ma'tj jytjaacue mjii. Nava jyucaysa fiymée tyā'wērrarrāatja'w Cristo nwe'wewa'ja's pta'shi!, atsa' tyā'sna i'cue i'cue'sha' ūuste jyapa'ga.

Uusaawe'sh qui' ityi yuua'lj

¹²Cue'sh pta'shni' Cristo ityi yuuni'scu caajiyu'jni yuu atsa' i'cue'sh yacj ūssa maaí yu' ŷma'wēta uusaawe'sha' ityi yuua'jsameeta' jina we'we'? ¹³Uusaawe'sh ityi yuua'jsameete!, Cristova ityi yuumeene'ga. ¹⁴Cristo ityi yuumeete!, cue'sh pta'shni' cyul yujna, atsa' Cristo' cue'shtyi nwe'wesa' sūjna i'cue'sh yaacynisava cyul yujna. ¹⁵Tyā'wē Cristo' ityi yuumée vá' atsa' cue'sha' Dyus dyi'pte i'shiisa yu'nja'w, Dyusa' Cristo's ityi vitcu jina pta'shpa'ga. Tyā'wē uusaawe'sh ityi yuua'jsameete!, Dyusva Cristo's ityi vitmeene'ga. ¹⁶Na'jī'tj na': uusaawe'sh ityi yuua'jsameete!, Cristova ityi yuumeene'ga. ¹⁷Sa' Cristo ityi yuumeete!, i'cue'sh ūuste yajcyrra Cristo' cue'shtyi nwe'wesa' sūjnisa' cyul yuj yuune!, atsa' i'cue'sh pcala' āchpcach Dyus peltunāynimée ūstyna. ¹⁸Tyā'wē ityi yuumée vá' atsa' Cristo's ūuste jyapa'garra uusaawe'sha' vitune'ta. ¹⁹Cristo yacj fi'nzeni' naa quiweterrāa selpiwa'jsate!, maateva jytjaacue cyulsa' cue'sh ne'tca'w.

²⁰Nava tyā'wēme!. Cristo' ityi yuuyujc. Uusaawe'sh nyafyte ityi yuusa' tyāac yu'. ²¹Ma'wēga naa quiwete uuwa'jva teech nasate tacj, tyā'wēy uurra qui' ityi yuua'jva teech nasatec tacj. ²²Teechsa Adanpa'garrāa jyucaysaty uuwa'ja's ji'pju, tyā'wēy teechsa Cristopa'garrāa jyucaysaty qui' ityi yuua'ja'sva ji'pju. ²³Nava tyāawe'sh ityi yuua'lj en ājte fiifirraj ityi yuutyna. Nyafyte! Cristo cjuē'ycu yatste ityi yuu. Tyāa e'suj Cristo qui' quīijana naapcach Cristo's jyapa'garra uusaawe'sh ityi yuutyna. ²⁴Tyāa e'su nmejsa pa'jana, tyajū Cristo' naa quiwetewe'sh vite' cielutewe'sh ma'ty yuu nava quij yujva nvijtmée jyuca caaptu'ju'jrra tyajy jycaajni's jyuca ducjena Neyas, tyāa yuurraa jycaacjan. ²⁵Nava tyā'wē yuumey yu' Cristo cjuē'y jycaajwa'jsa!, tyā'wē Dyusa' atsesa jyucaysaty Cristorrarrá's nwēese'jwa'ja's vitpcach. ²⁶Tyā'wē jyucaysaty Cristorrarrá's nwēese'jwa'ja's vitrra, nmejte! uuwa'ja'sva Dyusa' iviituna. ²⁷Dyus librate we'werra!: Jyucaysa Cristo's nwēese'jwa'jsata' jī'c atsa' Dyusva Cristo jycaajni yuuna sūjuvácue, nava tyā'wēme!. ²⁸Atsesa jyucaysa Cristorrarrá's nwēese'jetspcachja!, Dyus Nchi'c Cristoíiva Ney tashte nwēese'jya' ya'ducjena Ney macue ne' ūs pety tyāa yā'jrra jyuca. Tyā'wē yūute, Dyusa' tyāarrarrāa jycaajana.

²⁹Tyã'wě uusaawe'sh ìtyi yuuwa'jsameete!, ¿quĩjya'rráata tyã'wě ya'bautisaĩ' ìtyi yuuwa'ja's yajcyrra?

³⁰Tyã'wě ìtyi yuuwa'jmeete!, cue'sha' ¿quĩjya'rráatca'w een isa icj wēeni fi'nze!, ìtyi yuuwa'ja's pta'shna cyulterraá? ³¹Andya' tyã'wě yuj een isa icj wēeni fi'nze'tj tyã' ìshiinime!. Nava, yacjtj'jwe'sh, Jesucristo's ùste jì'pji'cue tyãa pa'garráatj tyã'wě yu' wechana. ³²Efesotewe'sha' yu'cj ech na'wě seena' weesweesata' jì'ty tyãawe'sh yacj iipuiitj. Nava andya' ¿quĩj yúurratca uuwa'ja's ùucju'tsmée? Tyã'wě uuyã'jrra' peena yu' ìtyi yuuwa'jmée dyijte!, isa yuj we'we'ne'ta na'wě we'wesa!: Û'na tundyna fi'nzega, uurra cytee ptsuwa'jsarráatja'w jisa'.

³³Tyã'wě ìtyi yuuwa'jme' jini's tyã'wě dyijna sũjna jypumbanuwe. Tyã'wěme!, namicuwe'sh ewmeesa' caypumba'jatyna ew fi'nzesa's jì'ty tyã' cytey yuuna. ³⁴I'cue'sha' jypumbamée fi'nzenite shawendrra, peena yu' pcalte fi'nzenuwe. Tyã'wě yúumeerra' i'cue'sh maafi yu' áchpa'jva Dyusa's jiimee'cue. Tyã'wětj áate we'we' tjaamerra jypa'yacy fi'nzeczajn.

¿Uusáa qui' ìtyi yuuwa'ja' ma'wěcy?

³⁵Nava maafi yu' pëyiváatyna na'jina: Uusáa qui' ìtyi yuuwa'ja' ¿ma'wěcy? Cacue ¿ma'wésa jì'pjutyqui? jityna. ³⁶Jiyuya' ája'tsmeevá'cue. I'cue'sha' peecy jiine'cue quij ñiña'sva uujte!, tyãa ñiñ cajcucj'ewé'sha' chimbi'c, naapcachja' dyiitewe'sh úsrráac buchá!. ³⁷Scuutyj ñiñ ma'c yuu meerra' fytúu ñiñ ma'c yuu nava uujte! tyãa ñiñírráa áate cáawa'jsame!, tyãa ñiñte úsrráa buchawa'jsa!. ³⁸Atsa' tyãa ñiñuj buchasa' cacue ma'wésarráj jì'pjuwa'jsateva tyã'wésac Dyusa' úsu!, quij ñiñteva tyãa iisa fifyirraj. ³⁹Tyajií cacue ma'wésava ústa!, nava tyã'wèrrarráa meeta!. Nasaa cacue' fiyta!, atsa' niimal cacueva fiyta!. Tyã'wëy fyuusáa cacueva fiyta!, atsa' yu'gawe'sh wendy cacueva fiyta!. ⁴⁰Tyã'wëy ée walateva ústa!, naapcachja' naa quiweteva ústa!. Nava ée walatewe'sha' fiy zhichcueta' naa quiwetewe'shte. ⁴¹Sec cweetjni vite' a'te cweetjniva fiyta!. Tyã'wëy estrella cweetjni vite' sec cweetjniva fiyta!. Sa' estrella pwe'sh cweetjniva puuty fiyrrarráata'.

⁴²Tyã'wëy cue'sh cacueva fiy yuuwa'jsa' qui' ìtyi yuunijũ!. Uute!, cacue ptsuwa'jsa's ya'penda'c, naapcachja' tyãa pendaniijũ qui' ìtyi yu'c peena yu' uuwa'jmée cacue yacj. ⁴³Cacue canzhsa's ya'penda'c, nava tyajũ qui' ìtyi yuurra!, seena' zhichcuesac yu!. Cacue selpimeesa'scu ya'penda!, nava tyãajũ qui' ìtyi yuurra bagachte yujva psumée selpiwa'jsac yu!. ⁴⁴Naa quiwete fi'nzeni cacue' vite!, atsa' Dyus tashte fi'nzewa'j cacueva vite!. Tyãa pa'ga cacue naa quiwetewe'sha's ya'penda'c, naapcachja' qui' ìtyi yuusáa cacue' Dyus tashte úswa'jsa'.

⁴⁵Tyajiíc Dyus librute we'werra!: Nyafyte pitstj'j Adana' naa quiwete ìtyi fi'nzewa'ja'srráac jì'pju' jì!. Nava nmejtewe'sh Adana' psumée ìtyi fi'nzewa'ja's peessa!. ⁴⁶Nava nyafyte cacue' Dyus tashte fi'nzewa'jsa

yu'tsme!. Nyafytwewe'sha' naa quiwete fi'nzeni cacuerráac yu', naapcachja' nmejte cacue! Dyus tashte fi'nzewa'jsa'. ⁴⁷Nyafyte pitstjē'j Adana' quiwe'scu pjeu'nisa yu' naa quiwetewe'sh, naapcachja' e'stewe'sha' Cristoc yu' cielujūwe'sh. ⁴⁸Naa quiwete jyucaysa nasaa cacue! nyafyte Adan cacueva ma'wēga quiwe yu', tyā'wēysa írráata', naapcachja' cielute ūswa'jsa cacue! cielujūwe'sh cacue na'wēy yuuwa'jsa'. ⁴⁹Ma'wēta'w āchva nyafyte Adan cacue's írráa ji'pjuya' āja!, tyā'wēy Cristo cacue's írráa ji'pjuya' āja'nja'w tyā'wē yuuwa'j en ājte!.

⁵⁰Yacjtjē'jwe'sh, i'cue'shtyi āatetj pta'shi!: Naa cacue yacja' cielute Dyus jycaajnite u'caya' ya'ājameena. Naa quiwete ptsuwa'jsa' ¿ma'wē bagachte yujva ptsuwa'jmée ityi fi'nzenite ūsya' ājacy?

⁵¹Āchja' pta'sh ya'vatj: Maaíi yu' nee uumée ūssa' naa dundte corneta tucani nmej susutspcachja', naa cacue's yu'ptjējni yuurra vite cacue jypa'ga'nja'w jyucaysa. ⁵²Tyā'wē corneta susutspcachja', uusaawe'sha' qui' ityi yuutyna peena yu' uuya'mée, naapcachja' naa dundte yaacyni yuumeete nee uumée ityi ūssa cacue! yu'ptjējni yuutyna. ⁵³Tyāa pa'gatey cacue ptsuusáa uunijū' vite cacue bagachte yujva ptsuwa'jmeesa's jypa'gawa'j ji'pja'. Sa' cue'sh cacue uuwa'jsa's yu'ptjējrra bagachte yujva uuwa'jmeesa's jypa'gawa'ja'. ⁵⁴Tyā'wē cacue ptsuusá' vite cacue bagachte yujva ptsuwa'jmeesa's jypa'garra cue'sh cacue uuwa'jsa's yu'ptjējrra bagachte yujva uuwa'jmeesa's jypa'ganijū' Dyus libruete we'werra!: Uuwa'ja's iviitunic yuu, peena yu' uu en pa'cjamen jī'c tyā' cytey yuuna. ⁵⁵Uuwa'ja' bagachte yujva mee yuucajn jyuca iviitute!, ¿ma'wē uuwa'j en pa'ja'cy uuwa'ja's ji'pjuwa'jsamée yā'jsa's? ⁵⁶Uuwa'j ena' pcalpa'garráac pa'j, atsa' tyāa pcala's cchjāachja'jsa' nyaffi leycu tyā'wē yuu. ⁵⁷Tyā'wēteva, Dyus tyacue ewte cue'shtyi jype'jsa Jesucristo pu'chpa'ga uuwa'ja's peena yu' ji'pjuwa'jsameetja'w.

⁵⁸Tyāa pa'ga andy yacjtjē'jwe'sh, bagachte yujva pu'vitumée Dyus yacj mfi'nzewe, Jesucristo's jwee írráa chjāchja selpiina, tyāa pa'gatey Jesucristo's selpinisa' cyulsame!.

Yacjtjē'jwe'shtyi pu'chwa'j vyu pcjacjni

16 ¹Nyaffi Galaciate ūsrra', Dyus luuchtyi caapiya'tj Dyus yacj fi'nzesaty pu'chwa'j ma'wē vyu's pcjacjwa'ja'sva atsa' tyā'sa' cytey myūuwe. ²Qui'sen iisa teechea na'wērraj i'cue'sh ji'pjuni's macue ūswa'ja'sva tyujnderra jyaawna me'jwe, andy pa'tje pcjacjna ūsya'mée. ³Cyte andy pa'jrra' tyāa pcjacjni vyu'sa' Jerusalenna caja'nja, atsa' ul'jwa'jsa pacueene'cue tyāawe'shtyi carta ūsu'nja, Jerusalente yacjtjē'jwe'shtyi ducjajni pety tyāa vyu yā'jrra. ⁴Meerra' andy yuu vāa ul'jwa'j casejena atsa' ul'jue'nja, nava tyāawe'shva andy yacj pi'cyna yuweetya.

Pablo u'jya' yaacyni

⁵Andya' yujrra', Macedonia quiwey uycjēwna yuwe'nja i'cue'sh tashte pa'jya'. ⁶Cyte pa'jrra' manz en jytjēyuuwá'nja meerra' nus en scjēwpcach. Atsa' i'cue'sha' pu'chjine'cue tyāajū andy qui' u'jwa'ja's. ⁷Dunderráa i'cue'sh yacj puuty uyya' yuu wēje'tsmeetj. Cyte tyachtju ūs wēje' i'cue'sh yacj, Dyus tyā'wē wendyvatsa'. ⁸Nava ayte Efesote nee ūsya'vatj, Pentecostes fiesta scjēwpcach. ⁹Tyā'wē atsesa ūsteva, Dyus jīi mji'wa'j wala ew yuutsa' naa pa'ga tyā'sa' iviitume'nja sūju'tj.

¹⁰Timoteo pa'javáana atsa' mpu'chwe, quījteva ñusmée wēt i'cue'sh yacj ūscajn. Tyā'wēme', tyāava andy na'wēyrráa Jesucristo's selpisá'. ¹¹Tyāa pa'ga quimva atsenuwe, wejyva mpu'chwe dyi'tje peejymée yuuwa'ja's, cyaj andy tashte qui' shawendna pa'jya' ājana. Tyā'wēme', andya' Timoteo's ūytjasna ūstju ayte yacjtjē'jwe'sh yacj.

¹²Apolosa's wala pytjaa we'wetj yacjtjē'jwe'sh yacj i'cue'shtyi puuty uyya' u'cjan. Nava āchjūi yu' dunduutsme', sa' maa ente u'jwa'j casejterrāava yuweena.

Yuwe wechaa caajny pta'shna fi'jni

¹³Jypa'yacy chjāchja mfi'nzewe, Dyus yuurrá's ūuste pechcanamée yajcyna. ¹⁴Quīj yūutsrrava peeygāawa'ja's yuurráa yajcyna tyā'wē myūuwe.

¹⁵Yacjtjē'jwe'sh, jiine'cue Acaya quiwete nyafyrraj Cristo yuwe ewsa's jypa'gasa' Estefanaswe'shta', sa' tyāawe'sha' wala selpiity Dyus tashte utyasaawe'shtyi pu'chna. ¹⁶Atsa' i'cue'sha' peeygāawa'j ji'pji'cue tyāawe'shtyi's meerra' maava tyāawe'sh na'wēy pu'chna selpisaaty. ¹⁷Andya' wala wecha'tj, Estéfanos, Fortunato, Acáico tyāawe'sh ayte pa'pja'ga. I'cue'sha' ayte andy yacj ūsmeerra', andya's pu'chya' āja'tsmeei'cue. ¹⁸Nava tyāawe'sha' andya's cchjāachja'jty Dyus yacj wechana fi'nzewa'ja's, sa' i'cue'shtyiva tyā'wēy ne'ta yuu. Atsa' nasa tyāawe'sh na'wēysaty' peeygāawa'ja'.

¹⁹Dyus yacj fi'nzesawe'sha' Asia quiwete yuwe wechaa caja'ty. Tyā'wēy Aquila ptamva yuwe wechaa caja'ty, cytee pcjaacjesawe'sh yā'jrra.

²⁰Yacjtjē'jwe'sh jyucaysa yuwe wechaa caajni's mpa'gawe, sa' teehsa na'wērraj puuty mweechawe.

²¹Pablo yaasesatj andy cuseju fi'ja' i'cue'shtyi wechana. ²²Maaíi yu' Jesucristo's atsesa ūsváatyna, atsa' tyāawe'shtyi' Dyus castigote iviituwa'j yuutyna. Cue'shtyi jype'jsa Jesucristo dund quíjvatsa' sūju'tj.

²³Jesucristo' i'cue'shtyi bendeciina. ²⁴I'cue'sh jyucaysaty'tju andy peeygāani's caja', Jesucristo's neewe'wena.